

وقت مستقطع

شروق بدوي

قصص واقعية

دار
المسيرة
للنشر والتوزيع

اسم الكتاب : وقت مستقطع
بقلم/ شروق بدوي رجب صابر سالم
طبعة أولى : يناير ٢٠١٨

التنسيق الداخلي : رفعت حسن سيد

دار العلوم للنشر والتوزيع

ص . ب : ٢٠٢ محمد فريد ١١٥١٨

هاتف : ٠١١٤٤٧٦٤٠٠٠

الموقع الإلكتروني : www.dareloloom.com
البريد الإلكتروني : daralaloom@hotmail.com
Facebook.com/dareloloom

Twitter: @dareloloom

جميع الحقوق محفوظة

رقم الإيداع : ٢٨٩٢٥ / ٢٠١٧

الترقيم الدولي : ٩٧٨-٩٧٧-٣٨٠-٥٤٦-٣

دار
العلوم
للنشر والتوزيع

إن الآراء الواردة في هذا الكتاب لاتعبر بالضرورة عن رأى دار العلوم للنشر والتوزيع

يمنع نسخ أو استعمال أى جزء من هذا الكتاب بأية وسيلة تصويرية أو إلكترونية أو ميكانيكية بما فيه التسجيل الفوتوغرافى والتسجيل على أشرطة أو أقراص مقروءة أو بأية وسيلة نشر أخرى بما فيها حفظ المعلومات، واسترجاعها من دون إذن خطي من الناشر

إهداء عام

- إهداء إلى كل من كان داعم لي .
- إهداء إلى كل من جاء لسانه بكلمة طيبة طبعت أثرها في هذا الكتاب .
- إهداء إلى كل من انعكست على قلبه معاني الصفحات وليس فقط على عينيه .

شروق بدوي

المقدمة

الأصدقاء ، كلمة أم معنى . . .

عالم الأصدقاء هو العالم الذي نعيشه يومياً ، هو حياتنا ، دائماً نلجأ إليه في الحزن والفرح .

إحنا بالفطره بنجري ع الصاحب في أي وقت ، أكبر مشاكلنا ممكن تكون مع الأصدقاء .

دائماً الصاحب مصدر أقوى من العيلة سواء للدعم أو للهدم .

أنا بقى قررت أعرف يعني أيه صاحب ، أيه هو الكائن ده اللي مسيطر علينا كلنا . . حبيت أعرف أنا صاحب ولا لأ ، واللي حواليا صحاب ولا لأ ، كنت بسأل كتير عن المعنى ده واختلقت الإجابة فعرفت إن الموضوع نسبي ، يعني المعنى يختلف من شخص للتاني ، بس أنا كنت مقتنعة أن أكيد في رابط مشترك بين كل المعاني دي . . حبيت أفسر رحلة طويلة معرفش نهايتها فبن بس همسيها عشان بس أوصل للرابط ده .

من ضمن الإجابات اللي قرأتها عن الصاحب ، أن الصحاب (٣) دوائر ثلاث جهات مختلفة :

الدائرة الأولى : هي الدائرة الأقرب وغالباً ما يوجد فيها شخص أو اثنين ، هما الأقرب إليك ، تلك الدائرة تحتوي على المشاعر النبيلة . أشخاص تحبهم أكثر من نفسك تعلم عنهم كل شيء ويعرفون عنك كل شيء غالباً

العلاقة متوسطة لدرجة كبيرة جداً، هم الأقرب والأقرب .

الدائرة الثانية: غالباً ما تحتوي على ٦ أو ٧ أشخاص بمعنى أصح " الشلة " دول أكثر ناس أنت بتحبهم وبترتاح معاهم ، دائماً خروجتنا سوى مع بعض كلنا قريبين من بعض يمكن هتفضل منهم واحد أو اثنين اللي هما في الدائرة الأولى لكن الدائرة عامة تحتوي على أكثر تعاملاتك في المجتمع ويمكن أن تصل إلى ١٥ شخص .

الدائرة الثالثة: تشمل كل من حولك وتتعامل معهم أغلبهم زملاء يمكن زملاء عمل أو دراسة ، ولكن هم مجرد أشخاص تعرفهم وتتعامل معهم ، ويمكن أن يكون التعامل بشكل يومي ويكون أقرب إلى الروتين .

وفي آخر رأيه عن معنى الصحاب قال إن لازم كل واحد يعرف هو بالنسبة للي قدامه في أي دائرة هل الأول أم الثانية أم الثالثة؟ وعلى تحديدهم للدائرة يمكن تحديد معاملتك مع الشخص ومعرفة حدودك .

يمكن عجبني الرأي ده جداً خاصة إنه قائم على التصنيف ووعجبني أكثر أنه لما أتكلم في الآخر مقالش أنك تعرف الل قدامك في أي دائرة بس قال تعرف نفسك في أي دائرة عند اللي قدامك .

لما فكرت تاني لقيت أن ممكن شخص معين يفقد دائرة معينة وغالباً ما تكون الدائرة الأولى ، هو فاقد للأشخاص المقربين اللي يفهموه من نظرة

عينه علشان كده رجعت ثاني للرابط ، إيه الرابط اللي ممكن نجمع بيه معنى الصحاب .

طبعاً جه كثير في بالي صفات مختلفة فيها الحلو والوحش زي الصدق والوفاء الخيانة الغدر الشهامة الأناية المصلحة وحاجات كثير أوي بس لقيت أن المعنى بيختلف خاصة الصفات الذميمة غالباً ما تكون سوء اختيار منا لكن مش صحاب ، لن ده مش معنى الصحاب أصلاً .

الصحاب أسمى من كده ، أسمى من مجرد صفات يمكن يكونوا بجد حياة ، لذا الرابط هو الحلقة المفقودة وقررت أبحث عن تلك الحلقة وأن أجد الرابط المنتظر .

في طريقي للبحث عن الرابط :

أصبحت تائهة كقارب فقد مساره . . . تاركاً للأمواج قدره حائر وبرغم الأمواج ثابت ولا يعم ما المسار حتى بكل تلك الأمواج لا يعلم . . . أعلم أنا أن القارب تائه ولكن مع بعض الوضوح نكتشف أنه تائه بسبب من فيه بالرغم من أنه من يحملهم أي أنه الأهم ، ولكنه غير مدرك لأهميته هو فقط غارق في تفكيره لإعادة المسار الذي يريده لذا هو لا يرى المسار والأصح أنه لأزال يبحث عن المسار المراد ولا يعلم أن ما يريده يمكن أن يكون به مالا يسره هو فقط يفكر ويبحث ومازال يبحث رغم أن من يبحث عنه يشاهده ويستمتع . . . السؤال هنا من المخطئ من وجهة نظري أراه القارب الذي ظل يفكر في المسار ولم يدرك أنه أهم من ذلك المسار .

لكني كقارب أدركت أهمية وقررت البحث عن الرابط وسط الأمواج مع إيماني الكامل بأنني الأهم . . . أنت أهم ما تملك . .

مشهد (١)

رد الغيبة

مع انتهاء الثانوية العامة وبداية الحياة الجامعية ؛ تلك الحياة التي يحلم بها كل طالب منذ الطفولة ، ولا أعلم إن كانت مثيرة لهذه الدرجة أم لا .

السنة الجامعية الأولى هي سنة التعارف بالنسبة لأي طالب ، يتعرف على النظام الجديد ، دراسة جديدة ، دكاتره ، معيدين ، محاضرات ، سكاشن ، معامل ، صحاب ، كل حاجة غالباً بتكون مختلفة ويمكن هو ده اللي مثير مجرد الاختلاف .

طبعاً معظم الطلبة بتتعرف على بعضها في الفترة الأولى لأن في الغالب يعني بيكونوا مش عارفين بعض قبل كده ، طبعاً مع الأخذ في الاعتبار أن ممكن يكون في صحاب من أيام المدرسة ودخلوا نفس الكلية يعني بس الأغلب بيكون من أماكن مختلفة فيكونوا مش عارفين بعض .

وبعد انتهاء الفصل الدراسي الأول نقدر نقول إن كل طالب قدر يكّون فكرة عامة عن دفعته وبكره (فكرة عامة) أصل ده مجرد ترم ، بس زي ما تقول كده الحلو ببيان والوحش بيان طبعاً مع اختلاف المعايير من شخص للتاني .

بس عادة كانت طالبة كل الدفعة بتشهد طبيعتها دي اكثر صفة كانوا دائماً يكرروها ليها أنتي طيبة أوي، لدرجة إن في ناس كانوا بيشوفوا ده هبل، الكلمة اتكررت كثير " أنتي طيبة أوي " .

هما كُونوا الفكرة دي عنها من اللي شافوه هما دائماً شافين إنها مش بتعمل حاجة غير إنها بتساعدهم بدون أي مقابل، هل أصلاً مش مستتية مقابل هي بتساعد بالفطرة، كانت طاقة إيجابية بتعيش في الجامعة، والموضوع بدأ يقلب عن بعض زمايلها لـ: أيه ده يا بنتي ده أنتي لو حد ضايقك أو أزايكي مش هتعرفي تاخدي حقك،

" مبد أيا أصلاً مفش علاقة بين الطيبة والضعف يعني مش معنى أن الإنسان طيب إنه ضعيف " .

يمكن كانت بتقابل ده بابتسامة عادي هي طول عمرها بتسمع كده ويرجعو تاني يقولوا " اني طيبة أوي " .

وفي يوم وهي داخلة " لأصحابها " سمعتهم بيتكلموا عليها يقولوا إنها اتغيرت أو إنها بعدت أو إنها اتغرت، عادة انسحبت بكل هدوء،

" معرفش انسحابها سلبي ولا إيجابي لكن هي عملت كده بتلقائية شديدة يمكن حسست إنها مش هتعرف تواجه "

بدأت عادة تسأل نفسها هو أنا أتغيرت بجد، هل كلامهم صح، بدأت تحاسب نفسها لكن مازالت مصدومة إنهم أتكلموا من وراها يعني حتى لو كلامهم صح كانوا يقولونها أو ينصحوها يعني .

مرت أيام وعادة تتعامل بطبيعية مع أصحابها يعني مع الاحتراس طبعاً في بعض المواقف . . . لحد ما جت " إيمان " قالت لعادة عايزة أقولك حاجة عادة : طبعاً اتفضلي .

إيمان : من فترة بصراحة أنا اشتركت مع بنات وكنا بنتكلم عادي وجت سرتك مش عايزة أقول شر يعني بس على الأقل مش بخير بس مترعيلش مننا أنا يمكن اشتركت معاهم بس بجد في كتير وأنا منهم " ردنا غيبتك " دافعنا عنك وقلنا إنك مش كدة، عادة أحنا صحاب وعمرنا ما هنفكر فيكي بحاجة وحشة أوعي تزعلي مننا .

ولما عادة رجعت لمكانهم تاني لقيت كل البنات واقفة وبيعتزولها كانوا متفقين على إيمان عشان يصالحوها مع أنهم ميعرفوش أصلاً إن عادة سمعتهم يعني بمنتهى السهولة كانوا ممكن يسكتوا وخلص .

عادة فرحت جداً وحست بجد أن أحلى حاجة سمعتها في اليوم هي أن في ناس ردت غيبتها، دافعوا عنها، قالوا اللي كان المفروض يتقال .

فعلاً من أجل الحاجات اللي يمكن تعرفها إن حد دافع عنك في غيابك .

أكيد اللي اتكلموا دول مش وحشين ما يمكن ظروفهم، ما يمكن عادة نفسها كانت تقع في الخطأ ده، لكن يجدوه مدخل من مداخل الشيطان ويجب القضاء عليها بقدر الإمكان .

عن أبي هريرة رضى الله عنه قال : قال رسول الله صلى الله عليه وسلم : أتدرون ما الغيبة؟ قالوا : الله ورسوله أعلم ، قال ذكرك أخاك بما يكره . قيل : أفرأيت إن كان في أخي ما أقول؟ قال : إن كان فيه ما تقول فقد اغتبتة ، وإن لم يكن فيه فقد بهته .

صدق رسول الله صلى الله عليه وسلم .

مشهد (٢)

التخلي... الفقد

مصطفى

مصطفى طالب مجتهد من وهو صغير، يعني دائماً زملائه شايفينه "دحيح".

مكنش له صحاب خالص من ابتدائي لحد ما دخل الجامعة، ملوش صحاب، لكنهم زمايل دراسة، دروس، مدرسة، نادي، وهكذا. . . بس صحاب صحاب لأ معندوش.

مكنش ييفرق معاه أوي، كان دايمًا شايف إنه كويس وتمام سعيد، بيعمل الحاجات اللي بتبسطة فعادي كمان بيقول لنفسه إيه اللي ناقصني.

لما مامته أو أخواته يسألوه يعني إيه معندكش صحاب؟ كان يجاوب بسخرية كده مع ضحكة ويقول: "هو أي حد يبقى صاحب مصطفى ده حتى عيب".

ويضحك، كان الموضوع مش فارق معاه بس كان نفسه يبقى ليه صحاب ويحس باللي كل الصحاب بيعسوا بيه، بس كان دايمًا يقول لنفسه إنه لما هيختار صاحب هيكون صاحب بجد، كان دايمًا يردد: أنا هكتشف صاحب ليا XD.

دخل الجامعة وبدأ يتعرف على زمائله في الجامعة وعدت السنة الأولى ،
وبدأت السنة الثانية كان يبحب كل زمائله وكلهم كانوا يبحبوه جداً ، بدأ
يبقى ليه زميل مُقرب " طارق " .

طارق كان زميل مصطفى وقربوا جداً من بعض بس طارق كان عنده
صاحب عادي ، بس طبعاً ميمتعش أنه حب مصطفى جداً .

بدأوا يقول مع بعض لحد ما مصطفى أخيراً حس إنه لقي
" الصاحب " . . . بدأ مصطفى ولأول مرة يعرف يعني إيه صاحب طبعاً من
وجهة نظره ، بدأ يتكلم مع نفسه ويعرف معنى الصاحب وهو طبعاً يقصد
مصطفى .

بعدها سأل نفسه كتير إزاي كل ده مكنش ليا أصحاب إزاي مكنش
حاسس إني وحيد .

كان شايف أن طارق رزق ليه كصديق " صاحب " .

(بقت العلاقة بين طارق ومصطفى متوطدة جداً من وجهة نظر مصطفى
أو على لسانه يعني)

وفي فترة قبل الامتحانات كده تعب طارق شوية ، بس تعبته ده خلاله
يقعد في البيت ومقدرش ينزل الجامعة لفترة طبعاً مصطفى كان دائماً معاه ،
تقدر تقول كده كان يروح الجامعة ويرجع على بيت طارق ويروح بالليل
ينام ويعيد اليوم وهكذا .

(شايقة من وجهة نظري أن فعلاً ده من واجبات الأصحاب شايقة إن اللي مصطفى عمله ده كثير جداً بس طبعاً مصطفى كان شايق أن ده العادي عشان شايقه صاحبه).

قام طارق بالسلامة وخلصت الامتحانات وجت الإجازة، بدأت الإجازة بس طبعاً يعني الصحاب مش بيخدوا إجازة من بعض XD.

كان مصطفى دائماً يكلم طارق ويخرجوا كثير لحد ما جه يوم ودار الحوار

ده :

مصطفى : إيه فينك XD بقالك كثير ختفي عامل إيه؟

طارق : أنا موجود عادي

مصطفى : مالك في إيه؟

طارق : مفيش عادي

مصطفى : هو إيه اللي عادي مالك أنت زعلان مني ولا إيه XD؟

طارق : لأ خالص

مصطفى : خالص هو أنت كنت زعلان بجد . . . ليه في إيه؟

طارق : مفيش حاجة خالص

مصطفى : يعني إيه مفيش مالك يا أبني في إيه؟

طارق :

مصطفى : هو أنا مزعلك بجد ولا إيه؟

طارق :

خلصت المحادثة وهو مصطفى حاسيس إنه مقلب من طارق يعني ،
أصل محصلش حاجة .

بدأ يكلمة تاني مردش ، بيعتله رسائل مردش ، راحلة البيت كذا مرة
وملاقهوش ، كانوا دائماً إخوان طارق يقولوا ليه : مش موجود .

بدأ مصطفى يحس بجد أن طارق بيهرب منه ، بدأ التفكير يزيد عنده
بطريقة رهيبة ، هو بجد زعلان مني ولا إيه؟!!!

مصطفى تعب بس مكنش عارف من إيه ، راح لدكاترة كتير ، كلهم
قالوا مفيش حاجة ، بس دائماً كانوا بيقولوا " حالة نفسية " .

مصطفى حس إنه فقد طارق بجد وبدون أي أسباب .

تمام ده الموقف بس كام حاجة أحب أناقشها وأوضحها :

أولاً : أكيد هيجي يوم ويشوف طارق ده في نفس الكلية بس إيه ردة
الفاعل معرفش .

ثانياً : مصطفى تعب بجد مع إنه مكنش ليه أصحاب ، بس تقدر تقول
إنه لما حس الإحساس ده وفقده شعر بفقدانه وتعب ، هو تعب
لما حس إنه فقده ، لأنه خلاص بقى عنده أمل " الصاحب " .

ثالثاً: مقدرش أقول إن طارق إنسان سيء مقدرش أحكم عليه من موقف، بس أقدر أقول إنه كان سبب في حاجات كثير منها
تعب مصطفى . . . طب ليه؟!

لأن ببساطة طارق مشي أو اختفى أو زعل أو أيا كان اللي عمله بس أنا بسميه "تخلي" هو اتخلي عن مصطفى ومشي . بس كده ده ساب وراه أسئلة كثيرة بدون أي إجابة، تساؤلات وتحمينات من مصطفى تفكير زيادة، ممكن يكون ده سبب اللي حصل لمصطفى أو هو فعلاً.

أخيراً: متخلاش عن حد وثق فيك، متمشيش وأنت سايب وراك أسئلة وعلامات استفهام، حاول متبقاش سبب في تعب حد، وحاول كمان متخليش حد أيا كان درجة قربته منك إنه يآثر عليك للدرجة اللي تحسسك بـ "الفقد" .

* الجزء الثاني من الرابط : التخلي متبوعاً بالفقد

يمكن من أسوأ أجزاء الرابط بس حقيقة موجودة، وبتحصل
وتهحصل .

طبعاً دي مش من صفات الصاحب، بس هي جزء من الرحلة . . .
الرحلة اللي بدأتها عشان أكتشف الحلقة المفقودة .

مشهد (٣)

المشاركة... السعادة

السعادة . . .

السعادة عندي ليها معاني كثير أوي ، لدرجة إن في ليها عندي معاني معقدة ، وأكتشفت إن موضوع السعادة ده بيختلف من شخص للثاني .

معنى السعادة نفسه بيختلف ، كل إنسان شايف السعادة بمنظوره ولو جربت تسأل حد هو يعني إيه سعادة؟ هيتردد كثير أوي قبل ما يجاوبك وهيفكر كثير جداً . . . قليل اللي هيجاوب برعة خاصة إنك سألته بشكل عام يعني إيه سعادة ، مسألتنوش مثلاً لو حصلك كذا هتبقى سعيد بسرعة ولا لأ؟ إنت سألت بشكل عام يعني إيه سعادة . . . ؟

السؤال ده أنا سألته لعهد ، عهد من الناس اللي جاوبتني بسرعة جداً وبتلقائية شديدة ، قالت لي : السعادة عندي بتتمثل في موقف يمكن احكيهولك . . . وحكيته :

عيد ميلادي ، اليوم ده دائماً بيكون روتيني جداً ، عادي كل أيام البشر روتينية بس أنا كنت بزعل دائماً إن اليوم ده بالذات روتيني ، كان نفسي دائماً يبقى مختلف ، فيه حاجة جديدة حاجة لما افتكرها أفرح وأضحك ، ويبقى عيد ميلادي يوم مميز عندي ، كل مرة أقول لنفسي أنا هفرح نفسي في عيد ميلادي ، عادي هحتفل أنا فيها إيه XD .

كنت كثير بحبيب لنفسي البلالين واسمع الأغاني اللي بحبها واليوم
يخلص وخلص ، وعشان مكنش متحاملة بس كانوا زمائلي وبابا وماما
بيقولولي " كل سنة وأنتي طيبة " ، كنت بقنع نفسي دائماً أني فرحانة
ومبسوطة باليوم ده .

لحد ما جه عيد ميلادي اللي فات ، عادي مش هقول إنني كنت ناسية
إن ده يوم عيد ميلادي ، لأ كنت فاكرة بس عادي إيه الجديد أنا اتعودت .
روحنا الجامعة ، وخلصت وروحت . .

أول ما روحت لقيت ماما مبتسمة كدة ابتسامة غريبة ، قولتلها ماما
مالك؟ ردت وهي كاتمة الضحك : مفيش في إيه يالا أدخلي بسرعة عشان
نأكل يالا ،

دخلت أودتي وأول ما فتحت الباب لقيت " دينا " و " فاطمة "
بيصرخوا في وشي . . . دينا وفاطمة دول صحابي ، اكتر ناس أنا بحبها في
حياتي .

لقيتهم بيحتفلوا بعيد ميلادي ، مزينين الأودة وجايين بلالين غير
الحلويات والتورتة ، وطبعاً الهدايا .

اليوم ده عمري ما هنساها أبداً ، اليوم كان مختلف بأصحابي مش
هقولك إن السعادة بقت تتمثل في عيد ميلادي لأ ، السعادة بقت تتمثل في
صحابي .

هما يعملوا كل حاجة أنا مجبهم عشان بس يفرحوني ، بدون مقابل ،
عرفت يعني إيه أصحاب ، يعني إيه سعادة إن السعادة بتتمثل في
"دينا" و"فاطمة" . . "أصحابي" .

(ده كان رأي عهد عن السعادة ، وأنا اكتشفت معنى جديد للسعادة ،
سعادة الأ أصحاب ، سعادتك بوجودهم ، وسعادتهم هما بوجودك ،
الأصحاب مصدر سعادة وفرحة ، مش لازم دائماً نكون بنفرح بعض ،
كفاية إن وجودكو ده سعادة ، سعادة في حياة بعض

خليك دائماً مصدر سعادة للي حواليك ، ومصدر أكبر للسعادة
لأصحابك ، أسعد بوجودهم ، أختار أصحاب السعادة أنتو حتى
لوزعلتو بتبقوا مع بعض . . . المعنى اللي أكتشفته هو "المشاركة" يمكن
أكثر من السعادة ، مشاركتك لأصحابك في كل حالاتهم).

واستكمالاً للرابط : "السعادة" ، "الأصحاب" ، "المشاركة" ثلاث
كلمات أريد أن أقول عنها إنها مرادفات لبعضها بعضاً .

في جزء من الرابط حله الوحيد يكمن في :

سعادة الأ أصحاب .

مشاركة الأ أصحاب .

مشهد (٤)

وفاء

خمس أصحاب

خليني أقول إن الأيام فرقتهم ، ما أحنا دائماً نحمل الأيام والدنيا كل الأسباب ، فدايماً نقول : فرقتنا الأيام ، الدنيا هي اللي عملت كده ، هي دي الحياة . . . إلخ .

وحاجات كتير بس قليل أوي لما تعترف إننا سبب في اللي الأيام بتعمله . .

المهم الخمسة دول كان في منهم اثنين قرييين أوي لبعض ، تقدر تقول هما حياة بعض أصلاً "إسلام" و "عُمر" إسلام وعُمر كانوا اثنين من الخمسة الصحاب ، كنت شايفة إن الصداقة بقى ليها معنى بوجودهم هما الاثنين . واتفرقوا . . . ؟!

مقدرش أقول نسيوا بعض ، مينفعش دول كانوا صحاب بجد . . . بس عارف : عزة نفسي منعاني ، غالباً دي الحالة اللي كانت مسيطرة عليهم ، مفيش حد اتنازل - لو هيسموه تنازل يعني - عشان صحبه ، صحبه اللي كان معاه ليل نهار محدش جرب حتى يكلم الثاني .

استمر الوضع ده ٣ شهور ، مفيش حد يعرف حاجة عن الثاني ، وفي يوم كلمت " سمر " إسلام ، سمر كانت زميلة ليهم زمايل دراسة يعني ودار الحوار ده :

سمر: إسلام إذيك وعامل إيه وإيه أخبارك؟

إسلام: أنا تمام الحمد لله . . أنت عامله إيه؟

سمر: أنا تمام . . كلمت عُمر وقولتله خلاص .

إسلام: كلمت عُمر؟! أكلمه ليه هو في حاجة؟ أنا مكلمتوش هو في إيه؟!!!

سمر: إزاي ده أنا قولتلهم يقولوك من أول امبارح إن هو نازل المظاهرات وقولتلهم يقولوك عشان هو مش هيسمع كلام حد غيرك .

إسلام: مجد؟! . . . مظاهرات؟ طب أقفلي خلاص .

إسلام نزل بسرعة جداً لعُمر بعد ما مكلمة ومردش عليه، وصل عنده في حوالي عشر دقائق وهو لحد دلوقتي ميعرفش ده حصل إزاي، لأن المشوار ياخذ وقت اكر من كده .

وصل لعُمر ولقاه ع الباب . . .

ممكن أقول إن دي كانت أكبر حاجة غير متوقعة لعُمر إنه يشوف إسلام وفي الوقت ده تحديداً .

قعدوا مع بعض وإسلام اعتذر لعُمر كثير جداً، إسلام نسي أي خلاف، نسي مين غلط، كان كل اللي هامه أن عُمر يسامحه ويرجعوا أصحاب تاني، فعدوا حوالي نصف ساعة وفعلاً عُمر سامحه، تقدر تقول خلاف ٣ شهورن خلص في نصف ساعة .

بعدها قعد إسلام ووالدة عُمر يقتنعوا عُمر بأنه مینزلش لأن طبعاً والدته كانت قلقانة عليه جداً، بس عُمر كان مصمم، غالباً كان مكرراً وفعلاً نزل المظاهرات، إسلام رجع لبيته وهو مبسوط إن هو وعُمر رجعوا أصحاب بس الانبساط كان مختلط بالقلق على صاحب عمره .

عُمر نزل المظاهرات، وفضل هناك، لحد ما في يوم وفي أحداث الثورة، عُمر خد ٤ رصاصات، واحدة في دماغه وواحدة في ذراعه، واثنين في صدره، وراح المستشفى وطلب أن يشوف إسلام . . . كان عايز يشوف إسلام بس .

والدة عُمر كلمت إسلام وقالته، إسلام راح لعُمر وهو مش شايف قدامه، . . . (اسمحولي اكمل على لسان إسلام وعُمر)

إسلام قال :

منظره لحد دلوقتي قدام عيني، كان كله دم، كان غرقان في دمعه، هدومه متقطعة، ده أبشع منظر ممكن حد يشوفه . . . عارف يعني إيه تشوف صاحب عمرك بيموت في حضنك وقدام عينيك . . .

لما عُمر شافه وهو بيعيط كده قاله :

كنت حساس بيا عشان كده جيتلي قول لكل العيال إن أنا مسامحهم عايزكوا أنتو اللي تطلعوا بيا، وخلوني الصبح علشان أنت عارف أنا بخاف من الضلمة، وخلي أُمي وأختي في عينيك ((عُمر باباه متوفى)) . . .

إسلام مكنش قادر يمسك نفسه من العياط، كمل عُمر وقال له :

يا عبيط أنا خدت الشهادة اللي عمرك ما تخيلت إنك تاخذها . . .
بجبك ومساحك وخليهم كلهم يساحونني وباس أيد أمه وقال الشهادة
ومات . . . عُمر مات .

عُمر مات قدام صاحب عمره، وده آخر كلام قاله حرفياً .
إسلام بيروح لوالدة عُمر وأخته باستمرار، إسلام مش مستوعب لحد
دلوقتي أن عُمر مات .

(الصحاب الخمسة رجعوا أربعة، رجعوا بعد ما فقدوا واحد منهم،
رجعوا ناقصين واحد، مقدرش أقول إن كان قدامهم فرصة يرجعوا
ومستغلوش الفرصة، أنا معرفش الظروف اللي فرقتهم، بس عارفه إن
طول ما هما بعيد كانوا دائماً في خيال بعض، كانوا دائماً "أوفياء"
لبعض، هما بنفسهم عرفوا واتعلموا حاجات كثير جداً، بس عُمر
مات "الله يرحمه" .

الرابط: الوفاء، الوفاء ليه معاني مختلفة، كل واحد شايف الوفاء من
منظوره هو، لكن أنا متأكدة أن الوفاء ده أحد سمات الصحاب بجد،
أعرف إن الصحاب دائماً وفي خليك وفي .

قول لأصحابك أنت بتحبهم قد إيه، قولهم أرجوك أنت متعرفش إيه
اللي هيحصل بعد شوية، أوعى تخلي حاجة تبعدك عن صحابك .

قولهم أنا بجدكم !!!؟

مشهد (٥)

سند

حسام . . .

حسام شخص الجد ، عنه والشهامة عنده غالباً جينات متوارثة مكش
يسمع حاجة غير " أنت جدع أوي " " أنت إزاي جدع كده " .

حسام كان بيععمل كل حاجة حلوة بجد ، وأنا مش هكون بباليغ لما أقول
إنه فعل بيععمل كل حاجة ممكن تكون بتساعد اللي حواليه ، وبدون أي
مقابل ، هو عارف إن ده الطبيعي ، أو بالنسباليه كان ده الطبيعي حاجة حد
محتاجها وهو يقدر يعملها ، فيعملها إيه اللي يخليه ميعملهاش . . . حسام
بشهادة كل اللي حواليه شخص جدع جداً .

ده ميمعش طبعاً إن كان في ناس شايفة غير كده ، ناس شايفة إن دي
سذاجة ، هو أزاي بيععمل أي حاجة كده للناس ، كانوا مستغربين أن هو
خير ، كانوا مستغربين مع إن ده الطبيعي ، وناس تانية شايفين أن حسام
لثيم ، أكيد بيععمل كل ده عشان عايز حاجة .

اللي لاحظته أن عمر حسام ما ردع الناس دي ، ولا حتى برر لهم هو
بيععمل كده ليه ، هو كان بيععمل كده بس ، بيعمله عشان هو عايز يعمله .

شهاب صاحب حسام المقرب ، شهاب هو اللي قال الكلام اللي فات
عن حسام ، قاله حرفياً ، يمكن زود وقال : أصل أنا مش هعرف أخلص
كلام عن حسام يعني ده حسام !!

كمل شهاب كلامه وقال : في مرة كلمني حسام وقالي تعالى في
مستشفى أنا مستنيك قولته في إيه ، قالي تعالى بس .

أنا رocht بسرعة جداً لقيت حسام واقف قدام باب الطوارئ وحضني
وقالي متخافش خلاص هي بقت كويسة ، قولتله بكل استغراب وأنا فعلاً
مش فاهم أي حاجة : هي مين؟ ، قالي : مامتك بقت كويسة خلاص .

اللي اكتشفته إن حسام كان جاي البيت عندي عاملي مفاجأة لأنه كان
مسافر ورجع ، بس أنا مكنتش في البيت ولما وصل ماما فتحته الباب
ووقعت ، طلع إنها كانت تعبانة جداً بدرجة إنها دخلت في غيبوبة سكر ، أنا
مش عارف من غير حسام كان ماما جرلها إيه مش عارف ، وجود حسام
هناك كان مجرد صدفة وترتيب من ربنا ، بس اللي عارفه أن هو كان سبب في
إنقاذ أمي ،

وعارف كمان أن حسام دائماً يبقى موجود ، شهاب كمل وقال :
عارفة أنا بحكيلك الموقف ده ليه؟ عشان حسام دائماً سند ليا ، حسام دائماً
جدع معايا ، يمكن هتشوفي الموقف ده كله كرم من ربنا في أن حسام يجي في
الوقت ده ، بس أنا بقولك أنني ببقى متأكد إن هو هيكون موجود في أي

وقت ، حسام سند ، أنا لو حد سألني مين سندك؟ بجد هقول وبدون تردد إن سندي بعد ربنا حسام .

عارفه يعني إيه حد بيعمل كل حاجة تفرحك بدون مقابل ، حد هو اللي دائماً بيسندني لما أقع ، بيشوفني وأنا زعلان ويقولني : اعمم شكلك زعلان تعالی يا حيلتها أحكي XD ، هو بيعرف إنني زعلان من غير ما أحكي .

حسام سبب في نجاحي ، اكرت واحد كان بيدعمني ، لما جيت أحضر الماجستير كان اكرت واحد مؤمن بيا وعارف أنني هوصل لهدفي .

أنا ساعات مبعرفش هو بيعمل معايا كده ليه ، وسألته في مرة هو أنت ليه بتعمل معايا كده؟ ليه جدع معايا؟ ليه بتدعمني؟ ليه عمرك ما خذلتني زي ما كتير خذلونني!!

عارفه قالي إيه؟! قالي :

" عشان أنت صاحبي ، عشان أنت بتعمل كل حاجة حلوة ليا من غير ما نحس ، عشان أنت شخص مفيش زيك ، لو عايز تلاقني إجابة لسؤالك فهي مش عندي ، أنا بعمل كده ومش هعمل غير كده . . . أنا بجدك "

يمكن صعب أوي خاصة عند الولاد أن واحد يقول لصاحبه بجدك دي XD دي صعبة جداً XDDD يمكن هو قالها عشان ملقاش غيرها ، يمكن وقتها أنا اتريقت ع الكلمة وقولتله بتحبني وده من أمتي XD ، بس كنت مبسوط جداً إن هو شايفني كده ، ولما انتي سألتيني دلوقتي : يعني إيه " شهامة "

" جدعنة " " سند " ؟ كان لازم أقولك كل ده ، واحكيك وأفهمك مين حسام ، عشان إجابتي على سؤالك هتتلخص في " حسام " .

دخل حسام وقطع جبل أفكار شهاب XD ، وقاله إيه بتعمل إيه؟ XD
قاله : كنت بجاول أشكر فيك وأكذب واوضعك بس البعيد قطعني وخلاني مكملش كلامي XD .

(يكن الموقف خلص بس بجد أنا عمري ما شوفت حد بيتكلم عن صاحبه كده ، دي كانت أول مرة أسمع ولد بيوصف صاحبه بالطريقة دي ، أول مرة أشوف حد متحمس أوي كده لصاحبه)

الرابط : فعلاً الصاحب سند ، الصاحب هو الشخص اللي دائماً جدع معايا وسند ليا ، الصاحب هو الشخص اللي أول ما يفرح يفتكره وأول ما بزعل يفتكره ، هو أول واحد بحكيه ، هو أول واحد بجري عليه ، . . .
" وهو الشخص اللي جه في بالك دلوقتي حالاً وأنت بتقرأ الكلام "

مشهد (٦)

استبدال... نسيان

الموقف المرة دي مدته صغيرة بس صاحب الموقف وهو بيحكيلي كانت عينية بتلمع لمجرد إنه افكر الموقف بس .

خلوني قبل ما أقول الموقف أحكي حاجة صغيرة لازم تعرفوها :

هما كانوا ٣ أصحاب ، على لسان صاحب الموقف مكانوش بيتفرقوا أصلاً من وهما صغيرين مع بعض لحد ثانوي ، قالي نصاً : كنا ثلاثة بس كاننا واحد!!!

قالي : في ثانوي بدأنا نبعد شوية بشوية ، بس مش البعد اللي هو تفرقة يعني ، لأ مجرد إننا بتتعرف على ناس جديدة ، هما بقى ليهم صحاب جديدة ، بس كنت متأكد دائماً إن مكانتي عندهم عمرها ما هتتغير ، مش عارف كنت باجيب الثقة منين .

يمكن عشان مكانتهم وقدرهم عندي عمره ما اتغير ، ولا هيتغير يمكن ده اكر حاجة ادتني ثقة أن مكانتي مش هتتغير مع إن ده مش دليل قوي يعني .

عادي كل واحد فينا حساباته بتتغير ، وأكد في حاجات كنت مجبها زمان ، ودلوقتي بضحك على نفسي وده لاختلاف مشاعري ، بس

هما لاً، هما عمرهم ما اتغيروا عندي، مكانتهم فضلت عندي واحدة
متغيرتش!

خلصنا ثانوي ودخلنا الجامعة، هنا اتفرقنا، كل واحد فينا دخل كلية
فبقينا مش مع بعض زي الأول، بس أنا كنت حريص جداً إنني أكلهم
دايماً، وأروح كلياتهم وأشوفهم.

بس في الفترة الأخيرة بدأت أحس أن هما مش عايزيني، أو بمعنى
أصح "ناسيني"، حسيت أن وجودي أو غيابي مش فارق معاهم، هما
بقي لهم صحاب جديدة، بس أنا مكتتش صاحبهم أصلاً، دي أكثر حاجة
كانت مسيطرة عليا.

مكذبش طبعاً أنا كنت بتضايق من كده جداً، بس برضو كنت حريص
أنني اشوفهم دايماً، عشان كنت فاكرهم أصحابي. مكتتش عايز أخسرهم.

شوية شوية حسيت أنهم بينسوني بجد، وفي مرة روحتلهم وقعدت
معاهم واحنا ماشين اتعمدت أنني أخّر نفسي شوية عشان أعرف هما
هياحظوا غيابي ولا لاً، واحد منهم بس لاحظ وقال: يا لا يا بني قاعد ليه
هنمشي.

فرحت جداً أن هو قالي واهتم، بس بجد كنت حاسس أنني ثقيل
عليهم، أن هما مش عايزيني.

فبدأ أختفي تاني، مروحش ليهم، مكلمهمش، بس كنت مستنيهم
يكلموني، يحسوا بغياي، بس هما نسيوني وانبسوا كده، ولحد دلوقتي
مستنيهم XD.

طبعاً بهزر، أنا مش مستنيهم بس عرفت أنهم نسيوني، عرفت إني
كنت دائماً أنا اللي باقي عليهم، عرفت أن خلاص كده، كنت رافض أن
القضية تكون انتهت بالشكل ده، بس كنت رافض أكثر إني اتعامل
بالطريقة دي.

بس أقتنعت أنهم نسيوني أو "بدلوني".

(قال كده وهو عارف أنهم نسيوه، مش عارف كان زعلان ولا ندمان
بس عارفة، أنه كان مبسوط أنه عرف هو إيه عندهم)

صعب جداً أنك تعرف إن قيمتك عند حد قليلة مع أن هو قيمته عندك
كبيرة جداً، بس بجد عايزة أقول أن غيابك ووجودك أكيد بيفرق مع حد،
بيفرق فعلاً.

الرابط: وأنا ماشية في رحلتي دي فعلاً شوفت كتير أوي ناس بتستبدل
وبتنسى، حسيت الموضوع موضحة بس اللي عايزة أقوله:

إن دول مش صحاب، دول عاملين زي المحطات إحنا بس بنعدي
عليها وبنم ونكمل طريقنا، الصاحب الحقيقي هيمر معانا بنفس المحطات
بس هيفضل معانا.

خلي ليك أثر باقي ، فلو حصل فراق أثرك هيبقى ، وإن كان الفراق بسبب أحدهم فهو لا يستحق من البداية أن يكون صديقك .

أحمد شوقي قال :

هجرت بعض أحبتي طوعاً لأنني وجدت قلوبهم تهوى فراقني
نعم اشتاق ولكني وضعت كرامتي فوق اشتياقي
أرغب في وصلهم دوماً لكن طريق الذل لا تهواه ساقني

- من حقك يكون ليك الصاحب اللي عمره ماهينساك ولا يستبدلك
أنت مش بديل .

- أنت كمان أوعى تنسى ، ده لو صاحبك بجد ، يبقى مستحيل تنساه .

(إن كانت ردة الفعل قاسية فأنا أريدك وإن لم تكن فأنا أيضاً أريدك ،
وإن قرأت فاريدك أن تعلم أنني أحبك وبرغم ما حدث وما سيحدث
أحبك وبرغم معرفتي بعدم قرائتك أحبك وبرغم كل شيء أحبك ،
أتمنى ردة فعل في خيال تلمس الواقع ، أتمنى أن تكون أنت الواقع . . .
يمكنني القول بأنني أتمنأك)

مشهد (٧)

تلون... نفاق

نهى

نهى بنت اجتماعية جداً، دائرة علاقتها واسعة جداً جداً، شخص اجتماعي من الدرجة الأولى، بتعرف تتعامل مع أي حد، وأي موقف بس مكنتش ليها علاقة متوطدة أوي مع حد، يعني مكنتش حد الشخص القرب منها أوي ده مكنتش موجود، مكنتش ليها الصديقة المقربة اللي تقدر تحكيلها أي حاجة وكل حاجة .

بس يمكن لأنها اجتماعية مكنتش بتفكر في ده، عادي يعني هي كل يوم مع الناس ووسطهم، وبعدين هي كانت بتحب الحياة أوي، كانت صعب جداً أنها تتشائم أو تكتئب، كانت متفائلة من الدرجة الأولى، حبوبة بشكل كبير جداً، وعلى نطاق واسع جداً جداً .

كانت ساعات بتشوف أن مفيش حاجة اسمها حد يكره حد، لأ ممكن محبش بس أكيد مش هكره، مستحيل، الكره كانت كلمة ملغية من قاموسها .

كانت بتحل مشاكل لناس كتير حواليتها من غير ما تاخذ بالها، يمكن لحكمتها ولكلامها ولباقتها، واحترامها، وحاجات وصفات كتير ممكن نقعد نحكي عنها للصبح .

بس الموقف اللي حصل معاها مخدش اكر من نصف ساعة :
كانت في الجامعة ومريم صاحبته كان شكلها زعلان أو متضايق من
حاجة معينة .

نهى : مريم صباح الخير . . . عاملة أية؟ مالك؟! !!

مريم : لا أنا تمام . . . لا مش تمام مش عارفة .

نهى : مالك؟ في إيه؟! !

مريم : هو ينفع يا نهى تكلميني بليل لما نروح أنا عايزة أحكي واتكلم
معاكي ومش هعرف هنا .

نهى : أكيد طبعاً ممكن . . . هكلمك بأذن الله .

نهى كانت حرفياً مشغولة بمريم زميلتها، كانت خايفه عليها بجد،
ويمكن قلقت جداً عليها لما قالتلها إنها عايزة تكلمها .

روحت نهى وروحت مريم فبعد المغرب نهى كلمت مريم فعلاً،
مريم حكّت لنهى حاجات كتيرة ومشاكل اكر، قالتها قد إيه هي مخنوقة
ومتضايقه ومش طاقيه حد، وفعلاً نهى حسّت أنها هونت على مريم كتير
جداً وخففت عنها فعلاً، بعدها قعدوا يتكلموا عن الكلية والامتحانات،
مريم كان عندها كام سؤال مش عارفاه فعادي نهى جاوبتها وبترحاب
كمان . . . بس ولحد هنا خلص الكلام اللي دام حوالي نصف ساعة فنهى

انهت المكلمة ب: أنا أسفة لو طولت عليكى بس فعلاً كنت قلقانة عليكى
والحمد لله أنك كويسة دلوقتي .

مريم : متقوليش كده تاني أنتي خففتي عني فعلاً ومطولتيش ده أنا
بشكرك على وقتك وصدافتك يجدد . . . يالا هقولك سلام يا
أحلى نهى وربنا يديم المعروف والحب بينا . . . سلام .
نهى : سلام يا حبيبتى .

نهى كلمت كلامها ليا وقالتلي : معرفتش ليه الموبايل علق ومقفلش
بس سمعت مريم بتتكلم فافتكرتها بتكلمني فحطيت الموبايل تاني على
ودني وسمعتها بتكلم حد جنبها ، عارفة كانت بتقول إيه ، كانت بتقول :
يخرب بيت رغيك يا شيخه هو أنا بكرهك من شوية . . .!!!!

نهى قفلت الموبايل في حالة من الذهول مختلط بالصدمة ، هي مكنتش
مصدقة أن مريم قالت كده دلوقتي ، قالتلي : أنا لو كنت مسمعتش الكلام
ده بودني عمري ما كنت هصدق ، بس أنا سمعته بنفسى .

(صدمة كبيرة إنك تسمع بنفسك حد يقولك : بكرهك)

نهى قابلت مريم في الجامعة بعد كده ، ومريم كملت كلامها مهاها
ومبالغتها في كلامها عن حبها لنهاى دائماً ، وشكرها دائماً في الشخصية دي .

نهى كان عندها سؤال واحد نفسها حد يجاوب عليه؟ لما هي مريم
مبتجهاش ليه بتقول عكس كده ، يعني ليه متسكتش خالص ، ما شي

مبتجبهاش تتجنبها وتتجنب التعامل معاها، إنما هي كانت "بتناقفها"
كانت بتقولها عكس اللي جوها .

(النفاق آفة حقيقية، لو في حد مبتحبوش تجنبه وهادم اللذات XD)

الرابط : متكرهش، لو في حد مبتحبوش تجنبه بس متكرهش أنا شايفة
إنك أعلى من أنك تكره حد، الحاجة الثانية أوعى تنافق، أنت متخيل إنك
بنفاقك ده ويمكن كام حد يتعشم فيك، أرجوك متعشمش حد وتمشي
متعشمش وأنت مش هتقدر وأنت منافق متعشمش حد .

- يمكن الجزء ده من الرابط مؤلم بس أنا فعلاً شوفته، في رحلتي
للبحث عن الحلقة المفقودة شوفت نفاق كثير جداً .

حاول تفرق النفاق وأكد متناقش، أنت أصلاً أعلى من أنك تنافق .

مشهد (٨)

خيانة

الموقف المرة دي درامي من الدرجة الأولى .

دائماً كنت أشوفه في الأفلام والمسلسلات بس ، كنت دائماً عارفة إن ده تمثيل ، كنت شبه متأكدة أن ده مستحيل يحصل في الواقع ، بس لما سمعت الموقف من ياسمين بجد حسيت أن ده جزء من الرابط يمكن جزء مؤلم بس هو فعلاً بيكمل الرابط .

ياسمين بنت جميلة جداً ، كانت عندها صاحبة اسمها ميادة ، كانت صاحبة عمرها ، كانت واثقة فيها جداً .

(لاحظت أن أغلب المشاكل بتيجي من ثقة زائدة)

ياسمين كانت بتحب ولد " محمد " ومرتبطة بيه ، كانت خطوبتهم كمان كام شهر ، كانت بتحبه جداً ، وهو كان يحبها جداً جداً ، ده كان كلامها بعدها قالتلي : أو كنت فاكرة أن هو بيحبني بجد .

ياسمين كانت بتحكي كل حاجة لميادة ، كل تفاصيلها غالباً .

(يمكن دي غلطة من ياسمين فعلاً) .

كانت دائماً لو فرحانه تقولها وتحكيها، ولو زعلوا تقولها وكانت ميادة بتصلحهم دائماً، فعلاً كانت أقرب حد لياسمين .

بعد حوال شهر عدى من الوقت ده، حصل شوية مشاكل بين ياسمين ومحمد، ياسمين كانت في جامعة، ومحمد وميادة في جامعة ثانية، فكانت دائماً ميادة تصالح بينهم بحكم أنها صاحبتهم وفي نفس الوقت مع محمد في الجامعة .

وجت فترة قرر ياسمين ومحمد، أنهم يبعدوا ويتغيروا، كل واحد يغير الحاجة اللي مش عاجبه الثاني عنه، ويرجعو ثاني، الاتنين قرروا، وميادة كانت اكثر واحدة متحمسة للفكرة .

طول فترة بعد ياسمين عن محمد، كانت دائماً ياسمين تطمئن على محمد من ميادة، تعرف أخباره وعامل إيه، وكانت بتقول دائماً لميادة إنها بتتغير عشانه، فعلاً ياسمين غيرت كثير من نفسها غيرت حاجات كثير كانت بتضايق محمد منها، كل ده عشان هي بتحبه، كانت مستتية اللحظة اللي محمد يرجعها فيها، ويتخطبوا فعلاً .

وبعد مرور حوالي ٣ شهور، راحت ياسمين الجامعة لمحمد، سألت صحابه عليه، قالوها: أكيد مع ميادة (مع ضحكة تعلق وجوههم) قالتهم: طيب هي ميادة فين، قالوها يمكن تكون خرجت كانت بتقول إنها عايزة تشوف كذا حاجة قبل خطوطها مش بنقولك مع محمد XD .

ياسمين ابتسمت ابتسامة صدمة ممزوجة بعدم وعي أو عدم استيعاب
للكلام ، وقالتهم : هي ميادة هتتخطب؟

قالولها : إحنا بنقول في إيه من الصبح ، هي من ساعة ارتباطها بمحمد
وهي معاه دائماً .

على لسان ياسمين : ده كان أصعب كلام ممكن أكون سمعته في
حياتي .

ياسمين عرفت أن السبب الأساسي في أنهم يتفرقوا كانت ميادة
اكتشفت أن صاحبة عمرها " خانتها " .

ياسمين قالتلي : عارفة أنا مزعلتش من محمد ، زعلت من صاحبة
عمري ، صاحبة عمري اللي بستأمنها عل كل حاجة في حياتي صاحبة
عمري اللي دائماً فاكرها ودائماً معاه . زعلت ع العشرة ، الوقت الجميل ،
والمشاعر مشاعر الصداقة اللي كانت بينا .

بعدها بفترة أنا واجهت ميادة وقولتها : أنتي ليه عملتي كده هو أنا
عملتلك أيه عشان تعملي كده؟! !!

ردت ميادة بكل مجاحه : معملتيش حاجة يا ياسمين أنا حبيت محمد
وزيك بالظبط وقررت أن يكون ليا ، ونفذت قراري بس .

ده كان آخر كلام حصل بين ياسمين وميادة ، ودى كانت آخر مرة
يتقابلوا فيها .

(أولاً: الموقف ده فعلاً عمري ما كنت هصدقه أصلاً، لكن لما ياسمين حكّلتلي، لقيت أن ده واقع ممكن يحصل فعلاً. ثانياً: لفت نظري وهي ياسمين بتحكي لي إنها قالت: أنا مزعلتش منه أنا زعلت من ميادة اللي كنت فاكرها صاحبة عمري، اكتشفت الرابط من هنا).

الرابط: المشاعر اللي بتوجد بين أي اتنين لازم تكون مشاعر نبيلة، فكرة إنك تاخذ صديق ليك وفعلاً تعتبره صاحب عمرك ومجذلك أحساس صعب، لقيت أن ده بيحصل كتير فاكشفت أن دول مش أصحاب، دول مجرد أشخاص إحنا بنختارهم غلط، هما مش صحابنا إحنا اتخدعنا.

- وأثناء رحلتي اكتشفت أن الخيانة هي جزء من المجتمع، واكتشفت أنني أيضاً جزء من هذا المجتمع، لكن أنت من تقرر، أنت من تصمد أبقي كما أنت ولو أتتك الخيانة فستظل كما أنت وهذا لأن (كل إناء بما فيه ينضح).

فأردد الإساءة بالحسنى فهذا من شيم الأصدقاء.

مشهد (٩)

دعم

"الدعم هو الشخص المتواجد في جميع الأوقات ، وإن كان وجوده معنوياً في بعض الأحيان ، فهو موجود بكلامه ودعمه وثقته في من يدعمه ، هو متواجد معه بشكل غير مألوف بالنسبة إلينا ولكنه موجود وسيظل يحمل تلك الصفة الغالية داعم منتظر "

" شرين " و " مي " صحاب من زمان جداً ، صداقة قوية جداً جداً ، عدوا بأزمات كثير أوي مع بعض أهلتهم بأنهم يكونوا صحاب بمعنى الكلمة ، أصدقاء بكل ما تحمله الكلمة من معنى .

لما سألت مي ، إيه اللي يفرق شرين عن أي بنت تانية عرفتيها؟ إيه السبب في أن صداقتكم تكون قوية أوي كده؟

ردت مي وقالت : داعمة .

وسكتت قولتلها كملي قالتلي : هي دي الإجابة ، شيرين أكبر داعم ليا الشخص الوحيد اللي بيدعمني وواثق فيا وفي قدراتي وشايفة أن أي هدف عندي هقدر أعمله واحققه .

طول عمري بيأس وهي الوحيدة اللي تفكرني بإرادتي وعزيمتي ، هي اللي تديني طاقة إيجابية ودفعة تحليني ممكن أعمل أي حاجة نفسي فيها .

كملت مي وقالتلي هاحكيك على حاجة :

في مرة كنت داخله مسابقة ، كنت لسة مقدمة فيها ولسة مقولتس لأي حد عليها ، وطبعاً كانت شيرين أول واحدة هقولها ، بس كنت لسة مقولتهاش يعني المهم وأنا قاعدة وبجهز نفسي وبشوف هقدرع المسابقة وادخل واجرب واللي يحصل يحصل ، ولا انسحب من الأول وأسكت وخلص لقيت شيرين بعثالي رسالة كتبالي فيها نصاً ،

هقولك حاجة ومتسألنيش ليه قولتها دلوقتي بس بجد أنتي هتبقني قد أحلامك أنا بوعدك بدة ، وهتقدري تحققي اللي أنتي عايزاه وأنا بقى عندي الدليل على ده . إنتي أعلى من أحلامك ربنا يحفظك والي عايزة أقولهاولك أنك هتقدري وأنتي أنا اللي هفكرك . أنا واثقة فيكي وفي قدراتك وهفضل جنبك عمري ما هسيبك ، أنا معاكي في كل الأوقات ، وبقولك تاني . . . هتقدري .

مي كملت وقالت : أنا ساعتها مكتتش عارفة أرد أقولها إيه ، ومكتتش مستوعبة الكلام اللي هي كتبته أصلاً ، حسيت الكلام جه في وقته أوي ، أنا فعلاً بلاقيها دائماً جنبني ومعايا ، عمرها ما خذلتني أو اتخلت عني ، دائماً معايا ، لما بحس أنني هتراجع بجيب الرسالة دي تاني وأقراها ، شيرين بتدعمني بكل معاني الكلمة ، اكرر واحدة بتحس بيا ، اكرر واحدة واثقة فيا .

خلصت مي كلامها وهي عينيها بتلمع كل ما تجيب سيرة شيرين
خلصت كلامها وهي مش عارفة إيه اللي عملته وعشان ربنا يرزقها
بشيرين .

(موقف بسيط بس دائماً بيفرق معانا، كلمة أنا واثق فيك، أنا معاك،
كل حاجة هتبقى تمام، أنت هتقدر، كل ده كلام بيدل على الاهتمام
والدعم، أكيد كل واحد فينا بيحتاج الدعم ده، عشان لازم يجي علينا
أوقات ضعف ويأس، ساعتها هنحتاج الدعم ده جداً، وفي نفس الوقت
لازم أنت كمان تكون داعم داعم حقيقي)

الرابط : وأنا ماشية في رحلتي دي، شوفت صحاب كثير بيقعوا،
ويضعفوا ويأسوا، بس شوفت صحابهم بيشدوهم، بيقوموهم تاني،
فعرفت أن دعم الصديق مختلف عن دعم الأهل والأقارب إنك تلاقي حد
يدعمك بدون أي صلة قرابة، شيفاهها من أعلى وأسمى الصفات اللي ممكن
يتحلى بها الأصدقاء .

كم من داعم أصبح هو الدافع في تحقيق ما نتمنى .

مشهد (١٠)

مسامح

(قوة من نوع خاص شوفتها في بنت اتحدت الظروف)

يارا.....

البنت دي بتتحلى لكثير من الصفات المتميزة لأي بنت ، مهذبة جداً مثقفة ، هادية ، لبقة ، مرنة ، حاسمة ، وكثير من الصفات اللي أي بنت تتمنى أنها تملكها ، بس لما يارا حكنتلي الموقف اللي أثار فيها واللي قررت أنني اكتبه اكتشف ، عندها صفة قوية جداً هي " التسامح " يارا اكرت إنسانة شوفتها بتسامح في حياتي ، القوة دي عندها ولن تنتهي .

لما سألتها عن علاقتها بأصحابها وعن مواقف أثرت في حياتها قالتلي إن عندها صحاب مقربين جداً وكمان زمايل كثير هي شخصية اجتماعية جداً ، وبشهادة كل اللي يعرفها هي شخصية محترمة بمعنى الكلمة .

لما قولتها : طيب أحكي لي موقف أثار فيكي بينك وبين أصحابك سواء المقربين أو الزمايل يعني قالتلي : هقولك موقف أثار فيا حرفياً وعلمي كثير بس هو مش مع حد من صحابي المقربين خالص ، هو مع شخصين كانوا زمايلي في الدراسة وبكنلهم كل احترام وتقدير..... وحكت :

بارا: لما كنت في الدراسة كنت مهتمة جداً بأنني أكون متفوقة في المجال بتاعي وأن مفيش أي حاجة تعطلني عن دراستي ، كنت حرفياً شايفة أن أنا ببني مستقبلي ، كان كل حلمي هو الوصول لشيء يمكن مكنتش أعرفه وقتها بس كنت شيفاه هدف سامي وعالي جداً، وكنت متأكدة أنه هيتحقق بجهد في دراستي .

لو عايزاني أتكلم بشكل أوضح كنت رافضة فكرة الحب والارتباط لخوفي أنها تعاطلني، بس ده ميمنعش أنني أكيد كنت بفكر بس بدون مياثر لتفكير على دراستي كمان كنت متأكدة أن الحب أو أي مشاعر تانية ربنا بيزرعها في قلوبنا لغرض معين، بس أنا كان لسة قلبي ما تزرعش فيه حد .

واحد من زمايلي الاتنين اللي قولتلك حصل الموقف معاهم أعجبت بيه، مش عايزة أقول حبيته عشان هو كان أقل من كده، أو يمكن أنا رفضت الاعتراف به لنفسي عشان بس متشغلش .

مكذبش عليك كنت فعلاً بحب أشوفه جداً، واستناه، يمكن فعلاً حبيت الجامعة أكثر وأيامها عشان بس بشوفه، بس كل ده وأنا مهتمة بدراستي وفي نفس الوقت بتعامل بطبيعية شديدة عشان ميحسش أبداً بأي تغير في معاملة معاه، خاصة أننا كنا زمايل أو أصحاب يعني .

"عبدالله " أو الشخص اللي أنا بكلمك عنه ده كان فعلاً إنسان بمعنى الكلمة ولو سألتيني يعني إيه إنسان هقولك أن تعريف الإنسان عندي هو

كائن سامي ومحترم ومتحكم ويمكن في الوقت ده كان بيتمثل عندي في
عبدالله .

مرت الأيام وبعدينا السنة الأولى ، وبدأت التانية وأنا بكنله نفس
المشاعر عمرها ما قلت بل كانت بتزيد جداً ليه ، وفي يوم بعدما خلصنا
محاضرات أنا روحت أوجب أكل جيه معايا وقالي : لبسك حلو أوي
النهاردة .

يمكن دي كانت أول مرة نتكلم في حاجة برة الدراسة ، اتكسفت جداً
بس فرحت جداً جداً ومعرفتش أرد قولتله شكراً ده من زوقك بس ، لقيته
كامل كلامه وقال لي : عارفة أنا ببحبك ، بالمعنى الحرفي الزمن وقف عند
الكلمة دي ، أصل عارفة يعني إيه حد أنتي بتحبيه بقالك سنة وتكتشفي مرة
واحدة أن هو نفسه الإنسان اللي ببحبك ، بصراحة وقتها معرفتش أعمل
حاجة غير أني سبته ومشيت لأنني فعلاً معرفتش أرد عليه .

خلصنا السنة ومكنش فيه جديد غير أنني بحكي لماما عن كل حاجة
بتحصل ، هو مقاليش حاجة تاني بس كنت بشوف كلام كثير في عينيه
ومعرفش ده كان بتهيألي ولا حقيقي ، جت الإجازة وقربنا من بعض بعدما
اتفقنا ع الخطوبة قربنا من بعض لمدة أسبوعين XD . أيوه والله بتضحكي ليه
اسبوعين بس أو عشان مكنش متحامله ٢٠ يوم XD بجد زي ما بقولك ،
واللي حصل بعدعها إنني سألت عليه في مرة مردش ، استنيتته مردش ، بدأت
أقلق عليه . بعته تاني وقولتله إيه هو أنا زعلتك ولا أيه بهزار يعني XD .

ود مش فالحقيقة قررت أنني هبعتلوش تاني XD وكانت المفاجأة بالنسبالي أنه اختفى ، حرفياً اختفى ، أنا اتأثرت جداً فعلاً ويمكن تعبت واللي تعبني وقتها إني مكنتش فاهمة هو في إيه . . . ؟!!

"علي" ده كان الصاحب المقرب لـ "عبدالله" وكان زميلي طبعاً، وده الشخص التاني اللي كنت بقولك عليه من شوية .

لقيت علي بدون مقدمات بيعتلي ويسأل عليا على غير العادة يعني ، بصراحة أنا مكنتش بحب طريقة علي أبدأ، مش معنى كده إنه مش محترم، بس دائماً طريقته كانت بتترفزي XD أنا حتى مش هعرف أشرحكلك هو كان بيعمل إيه عشان يقفلني بس فعلاً ده، قلوب يعني، وأنا فعلاً مكنتش برتاح أبدأ لما اكلمه أو لما يكون موجود، بس تقدرني تقولي زميل فكان مفروض ، بس مكنتش بشغل بالي بيه يعني .

بدأ علي يكلمني ويسألني في وقت ما كان عبد الله مختفي ، وحسبته بيلف ويدور في كلامه فصديته ومرة قولتها له حرفياً: قول اللي أنت عايزه عشان أنا مش مقتنعة إنك بتطمئن عليا .

لقبته بيحكلي آخر حاجة كنت متصور أنني اسمعها قالي :

أصل بصراحة الموضوع معقد أنا لقيت كذا ولد وكذا بنت معانا في الدفعة يقولوا أن أنتي إنسان مش محترمة ومش بيعترفوا بيكي والمشكلة أنهم قريبين منك وأنا بقولك عشان أحذرك، خاصة أن الناس دي ناس مش

كويسة وأنا بقولك أنهم مش كويسين والدليل على كده أنني أنا وعبدالله صحاب جداً وبتتكلم عن كل حد في الدفعة عشان نشوف وجهة نظرنا فيهم ونعرف شخصياتهم . . . أنا عالمي يا بنتي .

قولته : كمل وهرد مرة واحدة .

قالي : تمام . . . الحاجة الثانية هو عبدالله زعلان منك ليه ومش بيرد عليكى ، قولته : هو زعلان مني؟! قالي : آه وللأسف حكالي حاجة أنا مش قادر أصدقها أصلاً بس هقولك عليها : هو قالي يا علي أنا فاجأة لقيت يارا بتقولي أنا بحبك وبموت فيك وهي أصلاً بنت أنا مش عايز اتكلم عنها يعني بس أنت عارف .

عارفة أنا حرفياً وأنا بقرأ الكلام ده ضحكت جداً XD ، يمكن من الصدمة وقولته تمام أرد؟ قالي : اتفضلي ، قولته : أولاً بالنسبة للموضوع الأول أنت غلطت في زمايل معانا كتير وأنا مسمحلکش تجيب سيرة أي حد فيهم . ثانياً أنت شايف نفسك عالمي بأنك عمال تتكلم أنت وصاحبك عن الناس اللي في الدفعة وتجيب سيرتهم وعمال تتدور وراهم عشان تعرف عيوبهم ومن الآخر تذلمهم اسمحلي أقولك أن دى مش عالمية دي ليها لفظ ثاني مقدرش أوقوله بس أقدر أقولك أن رسول الله صلى الله عليه وسلم قال : " من تتبع عورات الناس تتبع الله عورته " صدق رسول الله صلى الله عليه وسلم . . دى مش عالمية يا أستاذ .

كملت وقولته : بالنسبة للموضوع الثاني فلا تعليق .

ولحد هنا خلص كلامي معاهم حسيت أنني بجد مش عايزة أتكلم ثاني ولو سألتيني طب ليه مقولتلوش على اللي عمله عبدالله معايا وعلى اللي حصل وأنه الموضوع غير ما هو حكاله خالص هقولك بصراحة حاجتين :

أولهم : أنني لحد دلوقتي مش مصدقة أن عبدالله قال كده ، يمكن عشان فعلاً بجه ويمكن لسه كمان بجه فحسيت أن هو مش هيقول عليا كده أبداً ، وحسيت أنني مش عايزة أجاري حوار مع علي ، خاصة أنني كنت متنفزة أن هو متقمص دور " خالتي اللتانه " XD وعمال يتكلم عن كل واحد فينا شوية وده على عكس طبيعة الولاد بشكل عام XD .

ثانيهم : أنني لقيت أن لو عبدالله قال كده فعلاً فهو ميستاهلش حتى أنني أعاتب أو اتكلم معاه ، هو حتى ميستاهلش أنني اتكلم معاه أو مع علي وأدافع عن نفسي . . . عارفة ليه عشان هما " ظلموني " .

أقولك حاجة كمان : أنا ساختهم ، معرفش ليه بس ساختهم ، حسيت أنني مش هسغل تفكيرى أبداً بيهم أو بكلامهم ، يمكن ثقة بقى في نفسي أو حاجة تانية بس فعلاً أنا ساختهم بس كده هو ده اللي حصل وفعلاً ده من أكثر المواقف اللي أثرت فيا وحسيت جداً أنني مسيطرة على نفسي وهادية وقوية ، تقدري تقولي " متملكة للغضب " XD .

(إيه القوة دي ، إنسانة يحصل فيها كل ده وتسامح عادي ، حسيت فعلاً بقوة رهيبية ، وحسيت فعلاً إن كل إناء بما فيه ينضح ، يارا من الآخر . كانت تقدر تعمل كتير بس هي ساحت ، أنا حسيت قد إيه هما قليلين أوي بصراحة ، التسامح قوة جبارة)

الرابط : التسامح أو إنك تسامح يعني قوة جبارة فعلاً مش أي حد يمتلكها أو يقدر عليها ، بس طبعاً من غير ما تضيع حقك ، وده مش معناه إنك متسامحش ، " العفو عند المقدرة " وفعلاً التسامح قوة لا يمتلكها إلا الحكماء الذين يعرفون أن قوتهم في تسامحهم ، فأنا من أخطأت بحقه وأنا أيضاً من سامح ، لكن الله هو العدل . . . فأنا ساحت والله العدل .

من أعظم الصفات اللي شوفتها في رحلتي وفعلاً موجودة في كتير من الصحاب " التسامح " وتشغلي جزء كبير من الحلقة المفقودة " الرابط " .

مشهد (١١)

قريب

(أثناء تلك الرحلة أخيراً أستطيع أن أقول أنني وجدت من أستطيع أن
أصفه بال قريب وليس فقط الصديق "الصاحب" . . .)

اللي حكالي المرة دي الموقف هو اللي أداني المعنى ده "القريب" ،
موقف بسيط بس كان كبير جداً عند "حسن" وهو ده اللي قالني الموقف .

حسن شخصية مثقفة مجتهدة مرحة جداً يعني كان بيعرف يفصل وقت
الهزار عن الجد، وده كان خلية ناجح جداً في حياته، لما سألت حسن عن
معنى الصاحب في محاولة مني لتكملة الرد قالني كده:

الصاحب من وجهة نظري هو الشخص اللي كنت فاكراه بعيد أو كنت
شايفه بعيد بس هو كان أقرب حد ليك، اللي عرفني المعنى ده "خالد"
صديقي أو صاحبي مش هقول صاحبي الوحيد بس هقولك صاحبي
"القريب" .

كنا مع بعض في ابتدائي بس هو فصل وأنا فصل مكنتش أعرفه أوي
يعني أكثر حاجة عارفها عنه أنه اسمه خالد، كبرنا ودخلنا إعدادي كنا في
دروس مع بعض بعدها في ثانوي كنا فصل واحد بقى، ويمكن في ثانوي
كانت علاقتنا متوطدة جداً، وده ساعدنا كثير في الجامعة هو دخل كلية وأنا

دخلت كلية بس عمرنا ما بعدنا، والموقف اللي حصل هو بسيط بس كبير أوي بالنسبة لي .

من فترة كنت بلعب كورة ورجلي اتكسرت كان ساعتها وقت امتحانات ميدتيرم وكده، طبعاً الموضوع كان صعب جداً جداً، أنا مكنتش حاطط في بالي الامتحانات عادي لسة في إعدادي ومش بهتم بالمذاكرة أوي يعني، وفي الوقت ده مكنتش أعرف خالد كويس أو مكناش قريين من بعض يعني أوي على عكس كثير من الناس حواليا، لكن اتفاجئت أن خالد عمل كل حاجة حرفياً عشان يختملي الإجازة ويأجل الامتحانات دي شوية، وكان بيضيع عليه حضور ودرجات بسببي وعمره ما فكر في حاجة زي دي، أبداً كل تفكيره وقتها كان إزاي يأجل الامتحانات عشان أنا رجلي مكسورة، يمكن الموقف بالنسبة لكثير منك بس عندي كان كبير جداً جداً، لقيت أن ده الوحيد اللي وقف جنبي وقتها وبالرغم من أن مكنتش في بالي حد يساعديني، بس حتى لو كنت فكرت عمري ما كنت اتخيل أن ممكن يكون خالد هو الشخص ده، يمكن عشان خالد صحابه كثير جداً وبالرغم من كده ملوش صديق مقرب أوي، ويمكن عشان كانت كل تعاملاتنا عادية، يمكن عشان حاجات كثير وبالرغم من كل ده هو اللي وقف جنبي، كبرنا ودخلنا ثانوي في فصل واحد زي ما قولتلك وفعلاً اكتشفت لخالد جوانب كثيرة جميلة جداً، وأهم حاجة عرفها اني " إن الصديق يجي من بعيد بس جد عنته تخليك أو تجبرك أنك تخليه حد قريب جداً جداً "

بعدها دخلنا الجامعة وجت فترة ماما تعبت جداً وكانت محتاجة عملية، وحددنا المعاد وكده وفي الفترة دي رجل خالد انكسرت، عايز أقولك إن وقت العملية مكنش بيقل التليفون معايا لمجرد بس إنه مش قادر يكون معايا في المستشفى، خالد حرفياً عمره ما سابني أو تخلى عني أو اتكلم من ورايا أو عمل أي حاجة من الحاجات اللي ممكن تخلي علاقتنا تهتز، وبقي خالد أقرب صاحب ليا، ومن ساعتها واحنا حاجة ربنا يديها بجد، بتتكلم كثير جداً، ولسة مرووح من عندي من شوية.

(من اكرت المواقف اللي أثرت فيا، فعلاً لقيت واكتشفت معنى أن يكون صديق قريب منك، الصفة دي مهمة جداً عند كل الأصدقاء، شخص بدون أي مقابل وبدون طلب منك كمان يبقى دائماً وجوده في حياتك شيء أساسي، وأنت وهو يجد بتكونوا قريبين، أقصد القرب مش منصب على واحد بس).

وإن طالت المسافات وإن تباعدت الأوقات ستظل أنت البعيد القريب، وسأظل أنا من أثق لانيك أنت من أجبرت.

الرابط: فكرة إن تكتشف حد قريب منك، وأنت كنت فاكره بعيد فكرة تستحق التفكير والتعب كمان لحد ما تحققها.

كن أنت من تستطيع أن نصفه بأنه

بعيد أجبرني على قربه بزهاء صفاته

مشهد (١٢)

عارفني..... بيستحملني

(في كل مرة بكتب مشهد أو موقف بتأثر بيه فعلاً وبيكشفلي جزء من الروابط اللي عايزة أوصل ليه في الآخر، بس فعلاً الموقف ده بالرغم من أنه بسيط وصغير جداً إلا أنه من أكثر المواقف اللي كشفتلي جزء كبير من الرابط)

أسماء، أسماء هي البنت اللي كشفتلي الجزء ده،

أسماء ليها صديقة مقربة جداً "إسراء"، دي أقرب صاحبة ليها، حقيقي أخوات، بيعملوا كل حاجة سوا، كانوا مع بعض في ابتدائي وإعدادي وثانوي، وتشاء الأقدار أنهم يدخلوا نفس الجامعة ونفس الكلية كمان، قوة ترابطهم كانت بتخلي أي حد يشوفهم يقولوا إنهما أخوات.

لما حد كان يشوف واحدة منهم لوحدها يسألها تلقائي فين توأمك كانوا بيعجبوا بعض جداً، عمرهم ما سمحوا لحد يفرقهم أو يبعد بينهم، قوة العلاقة والترابط ما بينهم فاقت الخيال.

وسألت أسماء... ليه إسراء هي أقرب حد ليكي بالرغم من أنك شخص اجتماعي، ليكي زمايل كثير، وفي ناس كثير بتحبك وبالرغم من كده أقرب حد ليكي هي إسراء، ما شاء الله عمركووا مازعلتوا أو بمعنى أصح مسمحتوش لزعل أنه يدخل بينكووا، عيزاكي تحكي لي عن إسراء وتقولي لي كنتوا كده من زمان ولا الترابط القوي ده من قريب...؟

ردت أسماء وهي مبتسمة ابتسامة كأني هيها جازية مثلاً، كانت فرحانه جداً وهي بتتكلم عن صاحبة عمرها إسرائ وقاتلي : إسرائ مختلفة، إسرائ هي اكثر حد فاهمني، إسرائ هي الوحيدة اللي لو سألتني مالك وقولتلي مثلاً مفيش الجيران عندنا قاعدين مع ماما هتفهم لوحدها إن اللي مضايقتني إن عندهم أطفال بيلعبوا في حاجتي ويعطلوني من غير ما أشرحلها أصلاً، ده مثال من ضمن حاجات كتير، إسرائ بتفهمني من بداية كلامي ومن نظرتي، من شرودي وسرحاني، ويقظتي، هي بتفهمني كأسماء لدرجة أنني بحس ساعات أنها بتفهمني اكثر من نفسي .

دائماً بحس إنها الطرف القوي، أنا دائماً بلجأ لها في كل حاجة، جت عليا فترة حسيت أنني مش بعمل معاها أي حاجة تخليها تفضل معايا وتساعدني كده، وبالرغم من ده كانت بتقولي العكس تماماً، كانت بتقولي أنني السند وأني اكثر حد بيدعمها ويفيدها حتى من غير ما أحس، إنا من كتر حبي ليها كان نفسي تكون أختي بجد اللي هو أشوفها كل الأوقات وفي كل الأماكن .

بالنسبة للترابط الحقيقة إحنا من زمان كده، بس في موقف يمكن بعده إنازاد تعلقني بيها حوالي عشر أضعاف عن الأول، هحكيلك الموقف باختصار :

من فترة كده كان عندي شوية مشاكل، وللأسف جيت ورا بعضها، كنت مخنوقة فعلاً، بس مش الخنقة العادية اللي ممكن تيجي لأي واحد شوية وتروح، لأ أنا حقيقي كنت تعبانة والمشاكل دي استمرت فترة، فترة طويلة بالنسبالي . . . إسرائ في الوقت ده كانت بتجيلي كل يوم تسمع مني نفس

الكلام من غير زيادة ولا نقصان ، شهر ونص إسراء بتجلي كل يوم بتسمع نفس الكلام ، عمرها ماملت أو زهقت أو حتى بتبني إنها متضايقة ، عمرها ما قالتلي إنا عارفة ما أنتي حكيتيلي قبل كده ، كانت بتسمعي بس ، اكثر واحدة " استحملتني " .

(كملت أسماء كلامها كثير حلو عن إسراء بس كل ما يجي سيرة المشاكل دي تلمع عينها إحساسها وهي عارفة أن صحبتها استحملتها كل الوقت ده بكل المشاكل دي . وكما نفس الكلام أحساس ميتوصفش ، أسماء فاكره كل حاجة حلوة لإسراء مش فاكرة ليها أبداً إنها زعلت منها في يوم أو إنها اتضاقت لأي سبب ، هي شايفة كل حاجة حلوة بجد)

الرابط : يمكن المرة دي الرابط انقسم قسمين :

الأول : المعرفة : فعلاً الصاحب اللي يعرف صاحبه كويس أنت مش محتاج تتكلم أو تشرح هو فاهم وبالتالي محتويك .

الثاني : الاحتمال (إنه يتحملني) : الصاحب فعلاً بيستحمل صاحبه في كل حياته بل في كل حالاته ، الصاحب عمره ما يزهدق أو يمل من صاحبه حتى لو عاد الكلام مليون مرة ليه ، هيسمعه كأنها أول مرة ، هو اللي دائماً معاك خليك دائماً معاه

مشهد (١٣)

متشابهين

يمكن التشابه بين الأصحاب ببيكون كبير جداً، لدرجة أن في أصحاب الناس بتكون فاكرينهم أخوات بسبب قربهم وتشابههم الكبير جداً.

كريم وخالد

كريم وخالد من اكثر الأصحاب اللي أنا شخصياً بحب علاقتهم واللينك اللي بينهم جداً، هما صحاب من زمان، عارفين بعض كويس جداً، وفاهمين بعض جداً، اكثر اتنين أصحاب حسيت أنهم بيعملوا كل حاجة مع بعض حرفياً.

لما سألت كريم عن موقف بينه وبين خالد، قالي: مفيش موقف معين، أصل أنا وخالد بنعمل كل حاجة مع بعض، بناكل ونشرب ونخرج وننفسح ونكتتب ونفرح مع بعض، حياتنا مشتركة تقريباً، بمعنى عقل واحد بس في جسمين XD.

كل موافقي معاه، مقدرش أقولك واحد بس منهم، أصل هقولك إيه؟ احكيلك عنه لما كنت هقع عن نفسي بسبب ضعفي في موقف معين وهو الوحيد اللي سندني، ولا، أحكيلك عنه لما جه بنفسه عشان يقولي اكثر خبر ممكن يفرحني في حياتي وكان هو أول واحد بيشاركني فرحتي،

أحكيلك عن تافهتنا في كلامنا عشان نضيع أي حزن أو اكتئاب ، ولا
أحكيلك عن إيمانه الشديد بيا وبأني هحقق أي حاجة نفسي فيها ، أحكيلك
عن قعدتنا مع بعض بالليل وإحنا مبنعملش حاجة غير إننا نضحك وبس ،
أحكيلك لما بتعب بيعمل إيه ويقف معايا إزاي ، ولا أقولك هو بيحاول
يسعدني قد أيه ، وأنا كمان بجد . . . بصي أحنا متشابهين جداً في كل حاجة
صفات كثير مشتركة ، وقتنا مشترك موباليتنا واحدة ، حتى لما بنزل بيكون
نفس السبب تقريباً ، ولما بنفرح بتبقى أسباب الفرحة عندنا قريبة جداً من
بعض بصي أल्ली أقدر أقول هولك إن هو كل حاجة ، هو حرفياً العالم بتاعي
اللي بقعد فيه ويهرب من أي حاجة ، ولو هواجه بواجهه بيه ومعاه .

لو قولت موقف واحد يبقى بظلمه هو مواقف متعددة وكثيره مقدرش
أختصرها في موقف .

بصي ككلمة أخيرة أحب أقولك : خالد هو كل حاجة .

كل حاجة بمعنى كل حاجة ، مواقف حياة عشرة قرب زعل فرح يأس
تفاؤل سند وفاء صدق أخوة إثارة كل حاجة بجد .

وعلى ذكر الإيثارة ممكن أحكيلك هو قد إيه بيديني دائماً على نفسه ،
بس مقدرش أعد كام مرة عمل كده ، هو دائماً بيعمل كده معايا ، وبدون
تفكير ، يفكر فيا قبل حتى ما يفكر في نفسه ، أي حاجة حلوة بتجيله حتى
لو مجرد مشاعر بيعمل كل حاجة عشان توصلني ويفرحني . . .

مش بقولك كل حاجة . .

(التشابه، فعلاً الأصحاب يكونوا متشابهين، روحهم متشابهة، صفاتهم وأخلاقهم وحاجات كثير).

الرابط : الطيور على أشكالها تقع ، فعلاً التشابه بين الصحاب كبير .

- أخبرني من صديقك أقل لك من أنت .

- فحين تختار الصديق أحسن الأختيار ، وكن أنت الصديق الذي نتمنى أن يكون اختيارنا بل نتمنى أن يكون رزقنا .

مشهد (١٤)

وقت مستقطع

طول رحلتي دي كنت بدور فعلاً عن الرابط . . . إيه الحاجة اللي بتجمع الصحاب . . . إيه هي الحلقة المفقودة . . . وتوصلت إلى الآتي :

- الصحاب مش بيغيب زي الشمس ما بتغيب ، الصحاب مش بيدوب زي الثلج ما بيدوب .

- الصحاب هو الذي تكون معه كما تكون وحدك .

- الصحاب هو الذي يقبل عذرك ويسامحك إذا أخطأت .

- الصحاب من يسد مكانك في غيابك . . . هو من يرد غيبتك .

- الصحاب كالمظلة كلما أشتد المطر زادت الحاجة لها .

- الأصحاب كيان متكامل ، دائماً بيكملوا بعض ، هما كيان واحد بكل ما تحمل الكلمة من معنى .

- هناك أصحاب لعقلك ، وهناك أصحاب لقلبك ، وهناك أصحاب

أنت بدونهم بلا هوية أولئك هم الحقيقيون .

- العلاقة بين الأصحاب كعلاقة العين واليد ، إذا تألمت اليد دمعت

العين وإذا دمعت العين مسحتها اليد .

(حكمة قديمة)

- الصداقة ليست بالوقت إنما الصداقة هي أن تبقى على العهد حتى وإن طالت المسافات أو قصرت .

- مجرد الحديث مع الصاحب في عز الضيق يشعرك بأنك مازلت حيًا وتتنفس يشعرك بأنك بحير ، يشعرك بتحريك من ضيقك .

- في كيانك هناك من هو فارق ، وهناك من هو فارغ " الصاحب فارق " .

- متى أصبح صديقك بمنزلة نفسك فقد عرفت الصداقة .

(ميخائيل نعيمة)

- الصداقة تحفة ، تزداد قيمتها كلما مر عليها الزمن .

- زهرة واحدة تستطيع أن تكون حديقتي ، وصديق واحد يستطيع أن يكون عالمي .

(ليو بوسكاليا)

- عسير إيجاد الصاحب ، يسير أن يكون أنت الصاحب .

- المسافات لا تقرب أحداً ، ولا تبعد أحداً ، وحدها القلوب تفعل ذلك .

(نجيب محفوظ)

- السعادة التي تشاركها مع الأصدقاء هي سعادة مزدوجة .

(غوثة)

- الأصدقاء هم شروق الشمس في هذه الحياة .

(جون هاي)

- صحبة الأخيار تورث الخير، وصحبة الأشرار تورث الندامة.

(ابن المقفع)

- لم صديقك سرّاً، وأمدحه أمام الآخرين.

(ليوناردو دافنشي)

- إذا كنت تملك أصدقاء، إذا أنت غني.

(بلوطس)

- مش مهم تكون جميل في عيون كل الناس، أنت جميل في عين اللي
بيحبك مَبهر في عين المعجب بيبك، وأجمل وأحلى وأغلى واحد في
عين صاحبك.

- قوة قلبك في الصدق، وطول نفسك في الصبر من دعم الصاحب.

- كلنا مهمين عند شخص ما، شخص بيشف الكون ناقص من
غيرنا، في غيابة بيزيد القلق جوانا، بتنتفض روحنا خوف عليه، كلنا
بيكملنا وجود حد قريب، حد يرسم للحياة دائرة أوسع من المحبة
بنا، بيزيد حماسنا بدفعة منه، بيزيد نبض قلوبنا في غيابة، كلنا في
حياة بعض بنكمل جزء ما، مفيش حد يقدر يكمل المسيرة لوحده،
وكلنا عند لقطه ما هنتحتاج دفعه، سندة، هنتحتاج لحد نكمل به أو
معاه الطريق.

(وائل نيل)

- كلام الصحاب بيكون امبارح ممكن يرجع لو رجعت زي ماكنت.

(مثلاً)

- ييفرق مين في الخصام خد خطوة القرب الأولى ومين عاند وراذ مسافات العضم مين في حزنك حاول يشدك ويخرجك منه ومين شد على إيدك ومشي، مين فضل جنبك عشان متضايق، ومين قالك هسيبك تهدي، ييفرق مين اتحجج لبعذك ومين تفادى أسباب البعد، ييفرق حد معاك علشان أنت موجود وحد معاك علشان محتاج يكون معاك، ييفرق حد ييشوف مشاكلك التافهة معاه مصدر سخرية ويتكلم عنها بضحكة وحد بيغلق بيها مشاكل جديدة، بتفرق لمحة عينيك واحنا بنتكلم عن حد معين، وبتفرق لهفتهم في انتظار رجوعنا، ييفرق الناس الصادقين في حياتنا، بتفرق لمة الصحاب بتفرق ثواني في قرب حد بتجبه، بتفرق مكلمة أبوك الصبح عشان يطمئن إنك وصلت، بتفرق مواقف الجدعان، وبييفرق وجود الأوفياء، بتفرق في أرواحنا البشرية حاجات بتقوينا على صعوبات الحياة.

(وائل نيل)

- الأصدقاء هم من كانوا عوناً في آخر لحظة السقوط، فما اتخلوا وما سقطنا.

- الأصحاب هم من أصبحت خطواتنا معهم واحدة، قرب بيحصل بدون تفسير واضح بدون سبب مقنع، حاجات بسيطة بتفضل بينا عمر.

قال رسول الله صلى الله عليه وسلم: "الأرواح جنود مجنودة فما
تعارف منها أئتلف وما تناكر منها اختلف"

صدق رسول الله صلى الله عليه وسلم

- أنا المنتبه لصحتك ، بينما الجميع منتبه لما تقول ، أنا التائه في حديث
صمتك فكيف هذا الصمود؟! حائر برغم صمتك المختلط بحديثك
وأعلم أن ما يضمنى عليك هو ذلك السكون ، (الصديق هو من
يعلم).

- عرفت أن الصديق لا يمل . ولا يكل من مشاكلي ومحادثاتي التافهة
بها ويعطيها الأهمية .

- أحد العناصر الخفية في نجاحي في تلك الحياة هو صديقي .

- صديقان مريضان طريحا الفراش أحدهما بجانب النافذة والآخر في
الجهة الأخرى ، من بجانب النافذة يروي تفاصيل الخارج لصديقه
ويبعث به الحياة ، عندما مات من بجانب النافذة طلب للآخر الانتقال
لمكانه وكانت المفاجئة أن النافذة تطل على حائط ، والمفاجئة الأكبر
أن صديقه كان أعمى ولكنه أراد أن يجعل حياة صديقه سعيدة
فأسعده بجياله رغم أنه حتى لم يرى هذا الجدار الأصم .

- عندما بكيت احتضني صديقي وأخبرني أن كل شيء سيكون على ما
يرام بالرغم من أنه لم يعلم بعد سبب بكائي ، ولكنه يعلم أن وجوده
سيحول كل الأمور إلى صالحني ، وسأكون على ما يرام .

- أثناء اكتشافني عرفت : أن الصديق لا يحتفي ، لا يترك لي أسئلة بلا
إجابة ، الصديق هو وجود وكيان بالنسبة لي ، ومن لا يفعل ذلك لا
يستحق لقب " صديق " .

- الصحاب دائماً رادد لغيبتك ، أنا عارف أنني مؤمنّ تماماً في أي مكان
صاحبي موجود فيه ، صاحبي عمره ما هيتكلم عني إلا بكل حاجة
حلوة ، صاحب رادد لغيبتي .

- الأصحاب سعادة ومشاركة ، الأصحاب هما اللي بيولدوا السعادة
في حياتنا .

- الصحاب دائماً وفي ، هو وفي بكل ما تحمله الكلمة من معنى ، وسيظل
وفاء موجود حتى بعد موتي .

- إن كان لديك صديق ، فأنت لك سند في تلك الدنيا .

- صديقي في خيالي اتمناه واقعاً ، ووجدتك واقعي ، ووجدتك أفضل
مما تخيلت ، وجدك " صديقي " .

- الصحاب مش بتشيل من بعض ، ممكن يزعلوا شوية بس عارفين
كويس أن عمر علاقتهم ما هتتهز ، ممكن يتخانقوا يزعلوا شوية
يتضايقوا أحياناً ، لكن عمر علاقتهم ما هتتأثر عشان هما أصحاب
يجد ، ده أحنا مجرد ما هنشوف بعض هننسى كل حاجة وهنجري
على بعض مع توبيخ مبدأي لحد ما هنرجع تاني عشان أحنا
أصحاب .

- الصديق هو الداعم ، الصديق هو الدافع في تحقيق ما أتمنى .

- وأنا في حلتي دي شوفت كتير ناس ضعيفة، ناس مستسلمة بس الحقيقة مشفتش حد عنده صاحب إلا وكان قوي، مرن، هادى، منشكح .

- الصديق مسامح، والتسامح قوة، إذن الصديق قوي مسامح من الآخر بنعدي عشان أحنا أصحاب بس أنت متستغلش ده ضد صاحبك، وإلا هيكون مش صاحب .

- " بعيد أجبرني على قربه بزهاء صفاته " ، لما كتبت الجملة دي عرفت إن صاحبي هو فعلاً أقرب حد ليا، وده من غير ما أطلب هو فعلاً قريب، . . . هو الي جه في بالك دلوقتي وأنت بتقرأ " أقرب حد ليا " .

- صاحبي عارفني وعارف حياتي، مش محتاجة أشرح تفاصيل زعلي، مجرد إني أقول ده أنا كنت في (مكان مثلاً) هو عرف مع نفسه سبب زعلي .

- عايزة أقول إنك مش محتاج تشرحه، هو فاهمك .
- الأصدقاء واهبي طاقة .

- في عالم الصحاب مفيش مقارنة، مفيش نفاق، مفيش غل، مفيش حقد، اصحاب عالم نقى عالي غالي .

- خير الأصحاب

إذا ضحكت لك الدنيا لم يحسدك .

وإذا عبست لك الدنيا لم يتركك .
" حكمة "

- على لسان أصحابهم :

○ أنا فاكِر زمان لما فركشت بعد أول حب جريت على صاحبي
عشان أتسند . . .

○ أعرف ناس صحابي حصل مع واحد فيهم ظرف واتزنق جداً
وكان مطلوب مبلغ كبير منه ، صحابوا جمعوا من بعض ودفعوا
المبلغ كامل .

○ واحد حصله ظروف كانت أن والده توفي كان بيحكيلي ويقول
أن صاحبي " فلان " وقف جنبى اكثر من أهلى نفسهم .

○ واحد صاحبي كذب على والد صاحبه ستين وقاله إنه مدخلش
كلية قمة ، عشان صاحبه ده مقدرش يدخلها .

○ (يمكن فعلاً دي مواقف بسيطة جداً بس بتأثر فينا جداً وبتكشفلنا
جزء كبير من الصاحب) .

- لو معندكش القدرة إنك تكمل لحد آخر نفس فيك مع صاحبك تبقى
مش صاحب .

- لو مش قد إنك تعافر وتصارع للظروف وتعمل اللي عليك وزيادة
عشان صاحبك تبقى مش صاحب .

- لو مش قادر حتى تسعده ولو بأقل القليل مش شرط يعني حاجة
كبيرة أعرف إنك مش صاحب .

- الصحاب بيستحملوا بعض ويفرحوا بعض بحاجات بسيطة جداً
- جداً، بيشلوا هموم بعض ويفرحوا مع بعض ، لو كنت كده أعرف
إنك صاحب حقيقي ويا بخت صاحبك بيك .
- صاحبي هو اللي قربي وجالي في وقت ما العالم كله بعد عني
وكمان اتخلى (لم يتركني وحيداً) .
- وأعلم أن أرفع منازل الصداقة منزلتان :
الصبر على الصديق حين يغلبه طبعه فيسى إليك ،
ثم صبرك على هذا الصبر حين تغالب طبعك لكي لا تسيء إليه .
- لما قالوا " الرفيق قبل الطريق " كان عندهم حق فعلاً عشان الرفيق
" الصاحب " هو الداعم الأساسي لإكمال طريقك ، اختر .
- قال لي أحدهم : البعض يلجأ للطبيب والآخر يلجأ الكبير . . أما أنا
أرتاح وألجأ إلى صديقي .
- صاحبي هو اللي كان موجود معايا في الوقت اللي كان ممكن يكون
فيه في مكان تاني .
- أخطر أنواع الوحدة هي وحدة الأصدقاء .
- " الارتياح " فعل تلقائي ملهوش تفسير أو تحليل منطقي ، فعل بتقف
قدامه ونفس الطريق اللي كنا متحركين من البداية علشانه ، الارتياح
هو الدافع اللي به متبكوش يتفكر في ارتباط الوقت فتشوف حد
وتقرر ترتبط عشانه ، هو إنك متحاولش تعرف حاجة عن حد قاعد
جنبك علشان تحكيه غير إنك بس ارتحتله ، هو القعدة اللي بدأتها

بـ "أنا ارتحتلك" وانتهت بـ "أنت ابن حلال"، الارتياح حتى مع الناس الكثير القريبة في حياتك اللي بيكون في منهم شخص تحديداً بترتاح بوجوده وكلامك معه، الارتياح فعل غير مُسبب فعل بنبدأ تعيين ناعنه بـ: مش عارف مثلاً "مش عارف ليه ارتحتلك"، مش عارف بس وشك في حاجة مريحة، القبول اللي بيحصلنا مع الناس اللي بنرتاحلهم بيقين وثقة في القلوب بيختصر سنين ترتيب في الكلام والوصف والتفكير، بيختص كل ده في أننا بس شوفناهم فـ "ارتحنا".

(وائل نيل)

- ممكن تتغير معايير أو قواعد كنت بتمشي بيها في حياتك، بس الصاحب عمره ما بيتغير.

- يكفيني لك الصديق الذي أعتبره نفسي، يكفيني حتى ولو كان صديق واحد، فهو بالنسبة لي عالم كامل.

- حين تسيء لي يا صديقي سأكتب ذلك على الرمال حتى تمحيها رياح السماح والغفران رياح الصداقة، وحين تقف بجوارري يا صديقي كعادتك سأحت ذلك على الصخر حتى لا يمحوه الزمن.

❖ الصاحب صفة من أسمى الصفات اللي ممكن حد يتمتع بيها، أن يكون في حياتي صاحب وإني أكون أنا صاحب ده شعور عالي بيخليك تحس أن الدنيا فيها حاجات كثير حلوة، فعلاً تأثير الأصحاب

هو أقوى تأثير ممكن تتعرضه ، بس اكتشفت إن مفيش صحاب بيأثروا بالسلب وإلا يفقدوا صفتهم ، لكن الأصحاب بيأثروا بالإيجاب حتى من غير ما تاخذ بالك ، وجودهم مريح ، لما بدأت أفكر في الحلقة المفقودة أو الرابط ، لقيت أن هما نفسهم الرابط ، الصاحب هو فعلاً اللي بيمثل الرابط ، الصاحب مجموعة كبيرة من الصفات والمواقف والعشرة والحياة ، والرابط عمره ما يكون صفة واحدة ، عشان كده الرابط هو الصاحب .

❖ كن صديقي

مشهد (١٥)

ما قبل الختام

اتكلمنا كثير عن صحابنا، وقولنا كل حاجة نفسنا فيها، وبدأنا نعبر عن معنى الصديق الحقيقي بالنسبانا، حبيت قبل ما أختم نشوف الصداقة في عصر رسول الله (ﷺ).

هحكي مشاهد بسيطة هتوضح معاني كثير، مشاهد متتالية ومتراصة يالا :

❖ مشهد (١) :

سيدنا أبو بكر الصديق (رضي الله عنه)، أول من أمن بالرسول من الرجال كان رفيقه في الهجرة، أول الخلفاء الراشدين .

❖ مشهد (٢) :

سيدنا أبو بكر الصديق (رضي الله عنه)، حين مرض النبي (ﷺ) وأصبح طريح الفراش، مستلقياً ببدن منهك، فذهب إليه سيدنا أبو بكر الصديق (رضي الله عنه) يزوره، فلما رآه متطحراً في فراشه حزن عليه حزناً شديداً، وعندما رجع أبو بكر الصديق (رضي الله عنه) إلى بيته وقع مريضاً حزناً على رسول الله (ﷺ)، ولما شفى النبي (ﷺ) من مرضه وعلم بمرض الصديق زار النبي أبا بكر الصديق، وعندما رآه تهلل وجه الصديق، وانبسبت أساريره فرحاً بشفاء

النبي (ﷺ) فقام واقفاً وقد شفى لرؤيته، وأنشد الصديق (رضي الله عنه) شعراً معبراً
عن هذا الحب المنقطع النظير وقال :

مرضى الحبيب فعدته فمرضت من أسفي عليه
شفى الحبيب فزارني فشفيت من نظري إليه

❖ مشهد (٣) :

يحكى سيدنا أبو بكر الصديق (رضي الله عنه) في الهجرة ويقول: كنا في الهجرة
وأنا عطشان جداً فجننت بمذقة لبن فناولتها للنبي (ﷺ) وقلت له: أشرب يا
رسول الله، يقول سيدنا أبو بكر: فشرب النبي (ﷺ) حتى ارتويت!!
هكذا الأصدقاء... إذا شرب أحدهم ارتوى الآخر.

❖ مشهد (٤) :

في يوم فتح مكة أسلم أبو قحافة والد سيدنا أبو بكر الصديق (رضي الله عنه)،
وكان إسلامه متأخراً جداً وكان قد عمى، فأخذه سيدنا أبو بكر الصديق
(رضي الله عنه) وذهب به إلى النبي (ﷺ) فقال له النبي (ﷺ) بقلب رحيم: يا أبا بكر
هلا تركت الشيخ في بيته، فذهبنا نحن إليه؟ فقال أبو بكر الصديق (رضي الله عنه)
لأنت أحق أن يؤتي إليك يا رسول الله (ﷺ)، وأسلم أبو قحافة...

فبكى سيدنا أبو بكر (رضي الله عنه)، فقالوا له: هنا يوم فرحة فأبوك أسلم ونجا
من النار فما الذي يبكيك؟ فقال: أبو بكر (رضي الله عنه): أنني كنت أحب أن الذي

بايع النبي الآن ليس أبي ولكن أبو طالب ، لأن ذلك كان سيسعد النبي
(ﷺ) أكثر .

(أبو طالب عم النبي مات ولم يؤمن)

❖ مشهد (٥) :

في طريق الهجرة من مكة إلى المدينة

قال الإمام الحسن البصري (ﷺ) : انتهى رسول الله (ﷺ) وأبو بكر إلى
الغار ليلاً ، فدخل أبو بكر (ﷺ) قبل رسول الله (ﷺ) فلمس الغار لينظروا
فيه سبع أو حية يقفي رسول الله (ﷺ) بنفسه .

فلما دخل الصديق (ﷺ) الغار بدأ يقطع من ثوبه ويسد الثقوب ، لما
رآه النبي (ﷺ) قال له : أفضعت ثيابك يا أبا بكر؟ قال : أخاف من شيء
يؤذيك يا رسول الله (ﷺ) .

❖ مشهد (٦) :

الرسول (ﷺ) لما كان نائم على رجل صاحبه أبو بكر الصديق (ﷺ) في
الغار ، وأبو بكر لدغه عقرب كتم صوته عشان مزعجش الرسول (ﷺ)
ويصحيه .

❖ مشهد (٧) :

طمأنة سيدنا أبو بكر الصديق (ﷺ) للرسول (ﷺ) في قوله : لا تحزن
إن الله معنا .

❖ مشهد (أ):

يوم الاثنين من ربيع الأول في سنة ١٣ من الهجرة، طبعاً الرسول بعد ما قال خطبة الوداع وصلى بالناس الظهر والعصر، وقف وقالهم آخر آية نزلت في القرآن بسم الله الرحمن الرحيم:

﴿... الْيَوْمَ أَكْمَلْتُ لَكُمْ دِينَكُمْ وَأَتَمَمْتُ عَلَيْكُمْ نِعْمَتِي وَرَضِيتُ لَكُمُ الْإِسْلَامَ دِينًا...﴾ (٣) ﴿صدق الله العظيم (سورة المائدة).

الناس كلها سمعت الآية عادية، زي ما الرسول ﷺ يقول ليهم أي آية في الدنيا، إلا سمعوا صوت واحد ورا بيعيط بيعيط جداً فالناس استغربت بيصوا القو سيدنا أبو بكر الصديق ﷺ عيط لأنه الوحيد اللي فهم من كلام الرسول ﷺ (إن دي النهاية، وأن الرسول ﷺ) هيموت، وإن دي آخر الرسالة، وأن دي آخر آيات القرآن، مفيش أي حد حس بالرسول ﷺ) غير صاحبه عشان كده بكى سيدنا أبو بكر الصديق ﷺ) بكى لأنه فاهم الرسول ﷺ)، بدون شرح من سيدنا محمد ﷺ) لأي حاجة، كان سيدنا أبو بكر ﷺ) يفهمه، لأنه صاحبه وشافه من جواه وحس بيه أوي.

(يمكن تكون وسط ناس كثير جداً ومحدث يحس بيك أو يعرف معنى كلامك غير شخص واحد بس).

مواقف كثيرة بين رسول الله ﷺ) والصحابة ﷺ):

بس حبيت أختار شخص واحد (أبو بكر الصديق (ﷺ)) لأنه كان أقربهم لرسول الله (ﷺ)، وفي نفس الوقت عشان أقول أن مش شرط يكون ليك أصحاب كثير كفاية حتى واحد . . . بس يكون فاهمك من غير ما تتكلم، يكون سنديك، يكون وفي ليك، يكون صريح معاك، يكون صاحب بمعنى الكلمة، يكون يستحق اللقب ده فعلاً.

الخاتمة

وخلص رحلتي قربت تخلص ، رحلة إنني أوصل للرباط والحلقة المفقودة ، اسمتعت جداً بكل القصص دي ، على فكرة كل القصص اللي ذكرتها قصص حقيقية وحصلت لناس أنا قابلتهم بنفسي وهما اللي حكولي القصص يعني حصلت لناس حواليك ، ممكن تكون بتشوفهم كل يوم ومش واخذ بالك ، المواقف دي حصلت ليك أنت شخصياً ، هتلاقي نفسك في كذا موقف منهم ، وهتلاقي أصحابك في كل المواقف .

المواقف دي حصلت فعلاً ، ولسه في كثير هيحصل ويمكن يكون لسه في كثير مكتشفتش ، بس متأكدة أن هيكون حلو ، حلو بالأصحاب .

طول رحلتي بشوف مواقف مختلفة ، في منها مُفرح وفي العكس وهي دي الحياة ، لا يمكن تكون كل حياتنا وردية ، بس اللي اكتشفته في رحلتي أن الأ أصحاب هما اللي بيخلوا أغلب الحياة وردية ، بما أن مش هينفع تكون كلها ، اكتشفت وعرفت أنهم سبب حاجات كثير حلوة وهما أحلاها .

عرفت أن فعلاً الصاحب حاجة نسبية ، بتختلف من شخص للتاني ، بس عرفت كمان أن دائماً المشترك بين الأ أصحاب هو أنهم أصحاب أصلاً .

عشت في كثير من المواقف وأنا حاسة نفسي أنا اللي بحكي ، كذا موقف وأنا بسمعه بفتكر أصحاب ليايهم نفس الموقف معايا فعرفت إن

الأصحاب فيه أكثر من حاجة مشتركة بينهم ، وعرفت أن المواقف بتكرر باختلاف المكان والزمان وبقاء الأصحاب ، عرفت أن الصاحب ميسببش مبيتخلاش عن صاحبه ، عرفت أن الصاحب وفي ، عرفت أنه جدع ، عرفت أنه سند ، عرفت كثير وعيشت في كل موقف وحسيته ، أصحاب المواقف وهما بيحكوا اختلفوا بالنسبالي .

- فيه اللي كانت عينيه بتلمع وهو بيحكي ، يمكن عشان الموقف حصل معاه زمان ويفتكر .

- فيه اللي كان فرحان ومبسوط جداً ، وفخور وهو بيحكي حاسس إنه بيحكي عن أهم حد في حياته (فعالاً الصحاب فخر) .

- فيه اللي عيط ، عشان فراق صاحبه ، أو عشان شدة جمال صاحبه معاه في الموقف .

بس بصراحة طول المواقف مشفتش أبداً حد مش مهتم ، أو شايف الموضوع تافه .

كان في تأثير رهيب في المواقف ، لقيت أن الأصحاب كصفة ليهم هيبه بجد .

❖ وأنت بتقرأ كل موقف علم على الموقف اللي أنت مريت بزيه في حياتك ، واكتب أسماء صحابك اللي شاركوك الموقف ، ولو كان الموقف مش لطيف خلاص أدينا بتتعلم ، بس لو كان الموقف حلو

ولطيف كلمهم أو ابعثهم رسالة فيها جملة واحدة "شكراً على
وجودك في حياتي" "دمت لي كما أنت، ودمت أنا كما تتمنى"

❖ أرجوك حتى لو كنت مش بتقابلهم زي زمان حاول توصلهم
وتقولهم، متخلش الوقت يسرقنا.

❖ ولما تخلص الكتاب كله . . . حاول فعلاً تكتب أسماء الناس في حياتك
على حسب الدواير الثلاثة وحافظ عليهم بجد، قربلهم وقولهم أنت
بتحبهم قد إيه وبدون سبب .

فهرس الكتاب

٥	المقدمة
٨	مشهد (١): رد الغيبة
١٢	مشهد (٢): التخلي . . . الفقد
١٧	مشهد (٣): المشاركة . . . السعادة
٢٠	مشهد (٤): وفاء
٢٤	مشهد (٥): سند
٢٨	مشهد (٦): استبدال . . . نسيان
٣٢	مشهد (٧): تلون . . . نفاق
٣٦	مشهد (٨): خيانة
٤٠	مشهد (٩): دعم
٤٣	مشهد (١٠): مسامح
٥٠	مشهد (١١): قريب
٥٣	مشهد (١٢): عارفني بيستحملني
٥٦	مشهد (١٣): متشابهين
٥٩	مشهد (١٤): وقت مستقطع
٧٠	مشهد (١٥): ما قبل الختام
٧٥	الخاتمة